



陶谷集八

墓碣銘
墓誌銘

卷十六

~ 16
2394
8



和
2394
卷 16-8

陶谷集卷之十五目錄



墓碣銘

平安兵使具公墓碣銘

司禦李公墓碣銘

宗廟副奉事尹君墓碣銘

司評韓公墓碣銘

通川縣監李公墓碣銘

教官宋公墓碣銘

義禁都事柳公墓碣銘

贈吏曹判書金公墓碣銘

附名集 一
大丘判官趙公墓碣銘

左通禮朴公墓碣銘

典籍金公墓碣銘

金山郡守李公墓碣銘

工曹正郎鄭公墓碣銘

刑曹正郎金公墓碣銘

通德郎安公墓碣銘

沃川郡守安公墓碣銘

贈左承旨趙公墓碣銘

黃海兵使趙公墓碣銘

右副承旨申公墓碣銘

刑曹佐郎李公墓碣銘

昌城府使朴君墓碣銘

軍資判官鄭公墓碣銘

義州府尹俞公墓碣銘

副率金公墓碣銘

花浦先生洪公墓碣陰記

檢閱吳公墓碣陰記



陶谷集卷之十五

墓碣銘

平安道兵馬節度使具公墓碣銘

并序

公諱鳳昌字景瑞綾城具氏也其三世曰察訪密兵
 馬節度使義俊贈戶曹叅判行而母清風金氏忠義
 衛錫胤女公實以副護軍文彬之子出繼于叅判公
 其本生曾祖祖考曰展力副尉理淵學生滌母平山
 申氏學生命和女上世領議政忠烈公致寬為公本
 生八世祖而忠烈弟知中樞府事胡襄公致洪為叅
 判公七世祖斯其系派然也公早孤零丁學于直齋

李公箕洪頗見獎詡家貧急親養投筆取丙辰第金
公錫胄申公汝哲以文武掌兵柄雅負鑑賞推轂公
甚至首薦爲宣傳官陞佐都檢府四轉爲訓練正武
弁華踐也外歷全羅兵虞候全州營將伊川縣監鳳
山錦山郡守肅川金海府使忠清水使慶尚左兵使
公才望夙茂其調外多因事特柬非例補也在所輒
有聲績及出嶺閩以節度公舊莅益感勵自飭民譽
騰播癸卯除忠清兵使爲兇徒擊去乙巳改紀朝議
欲重用公旣超擢爲禁軍別將而轉訓練中軍則寔
軍國亞將爲登壇之階也俄出爲平安兵使時公年

垂七表而神氣猶旺殫心竭智鉅細畢舉還復亞訓
局會時事變更自免去戊申逆亂作自鄉居倉皇入
京誓以一死報國環甲枕戈夜以繼日恒忿憤不已
屬疾以次年正月廿四日卒壽七十三錄賊變時扈
衛功贈兵曹判書夫人全州柳氏通德郎廷讓女有
婦德後公七年卒壽八十一與公同葬于廣州實村
無子有一女適尹敬夏而衡國恒國其出也生員願
柱公之繼子而師柱謙柱側出也願柱又無子有繼
子宗煥新登武科二女適生員韓正養李聖模一尚
幼余嘗習知公爲人矣風標俊嶷眉目精明性伉特

確有操執屢經世變亡少撓奪見有隨勢俯仰者耻與並跡在州閩問訊朝貴亡異餽人或諷之乃曰爾欲使我爲債帥耶西閩時大官不喜公有欲居間解驛者峻斥之以此仕宦輒槃桓難進竟未能大有展施惜也本之則居家孝思篤至處官廉白表著皆其修於內而布於外者也可不謂賢乎武而且賢銘之庶可以亡愧其銘曰

卷婁濡需橐鞬之常奎蹄曲隈自爲室堂异哉夫公胡是之盃不以域進用義自厲師垣宿望泥於世故惟有素守可風末路廣陵之阡屹彼樹碣我詞不諛

來許是質

世子翊衛司司禦李公墓碣銘 并序

公諱世澤字士潤系出璿源 世宗大王别子密城君章孝公諱琛之八世孫也曾祖諱申祿監察祖諱碩輿縣監考諱敏學通德郎妣光州金氏公以 崇禎辛巳生出爲叔父後以府使諱敏行安東金氏爲考妣少學于族叔父竹西公敏迪砥行礪操蔚有成立士友多稱之少荐遭本生考妣所後考若祖考妣喪公家素貧竭力營辦又執禮不解用是勞瘁毀瘠幾滅性因廢舉屏居驪江先墓下捐棄世紛悠如也

晚卜東湖奉所後母志養亡缺丙寅始仕爲繕工監
役陞司贍主簿出爲稷山縣監行政以恤民隱理冤
獄爲先而律已清約一芥不以近異趣者亦心服甲
戌丁內憂旣除入金吾爲都事又出莅楊口縣治盖
視稷而忤上官罷歸拜 世子翊衛司司禦除扶餘
縣監不赴又由義盈主簿出麒麟察訪還拜翊贊陞
司禦年七十八而卒于其三月十四日窆于驪州活
臺山與淑人南陽洪氏同穴公爲人恬雅簡澹於物
亡所好顧常喜讀書至晚年不披卷暗記猶歷歷每
清晨靜夜誦庸學章句關洛諸賢箴銘贊至老不廢

戒諸子曰持身當如處子善居鄉最難慎勿與雜流
交遊也平居不談人長短有問亦默不應每之官以
伯氏往事之如父撫養庶弟妹婚嫁必以時奉公恪
勤事無罅漏 肅廟嘗謁園寢見陵石美問知爲公
所監治內善之已攝通禮贊引有儀度亦識有焉後
遇銓注雖卑擬必下點始公在湖縣值 聖母幽廢
卽投印歸後口不言其時事人尤賞其斂晦也公嫉
世俗奔競之習未嘗自爲干求語宗族多貴顯閔其
老且貧時有甄錄輒勉起否則却掃湖上耽翫典籍
而已於戶外事一不顧問淑人在室有令聞旣行能

黽勉有亡育恐育鞠以協中饋之吉而絕不要索於人教子嚴正儼然有丈夫法度語與公同年生年六十八先卒有三男三女男聖彥最彥重彥俱中司馬試仕俱至縣監女適生員金錫扈進士韓以興士人鄭來昌聖彥生男道祥定祥女適金道淳生員任翼周最彥無子以從弟子庚祥爲後女適成道存進士趙英彥宋必重宋昂相金達升重彥生男駿祥進士金有子相一韓有子學增生員宅增福增道祥男英翰英源英秀英保女適任弘中駿祥二女英翰二男一女英源二男內外孫曾玄總八十餘人不佞章孝

公之彌甥也與公有累世媯親之好蓋嘗還往問訊者積十數年知公長者久矣今於公諸子之謁銘敢不樂爲之辭其銘曰

驪江之麓水清山肅埋此好人從以碩媛合德齊芳
歿穀偕臧我銘幼婦用告來後

宗廟署副奉事尹君墓碣銘

并序

余年弱冠有朋來自遠者問之姓尹名處謙生後余一歲卽我先妣姨弟之子也與余爲中表兄弟眉眼如畫容儀端美古所謂皎如玉樹臨風前者實其人也余喜相見之晚遂同與爲博士家業君文才出倫

尤善程式詩廿四中上舍選聲名籍甚先妣舉以戒厲余曰少者已如此爾顧不及寧不愧乎其翌年余猥擢第大庭而君乃屢舉輒屈念家貧門衰必欲自奮立身益攻苦不懈卒落拓亡所成年且居然遲暮矣歲辛丑余忝長天官薦士固其任而君猶着麻衣乃舉君首擬 陵官未拜會時事大變余謫西塞而君亦無意于世居四年余蒙恩還朝復入銓又薦授北部叅奉轉 慶基殿又轉 昌陵任滿例陞 宗廟署副奉事屬疾下鄉以周甲歲庚戌十一月廿九日卒于家嗚呼上世才者顯不才者斥中世寢垂至

叔季則一切反盪如余之陋劣鷓梁濡翼不稱其服君之才淑沉淪田罷顧領終窮斯固時勢之使然尚何足怪乎君之志盖不徒然而泯泯黃壤中人顧罕知其抱負今乃借余荒落之筆欲以求顯於身後可哀也已君字伯益系出坡平文肅公瓘二十世孫先故累公累卿至君曾祖考宗立祖考世鳴考以任俱不仕祖考公娶花浦先生洪公翼漢女仍贅居洪公鄉平澤鯨井里君自出平山申氏而生於牙山大谷里居焉亦申氏鄉也君爲人慈良愷悌孝友篤至其事親也生事葬祭與夫侍疾持衰羣行焯焯俱加人

數等幼爲外王母所育致養極盡及喪心制服三年人稱之曰於外氏尚然孝於親固其宜也待同氣之間一已家幾絕火而有得輒分怡愉湛翁幼老亡易伯父叅奉公性嚴重於人鮮有當意者獨愛君甚期以遠大李徵君東修士也每稱君溫慤之中自有難奪之守我先君亦深許之常以取友必端詔余而於君甚喜其同業也君筮仕只一命官耳事蹟無表見於世者而亦能秉持士操隨盡其所當爲在 昌陵時見沙溪先生遺愛碑墮落田間亟取而剜剔之樹諸路左盖沙溪曾任 陵官也此雖細事慕儒學修

廢墜俱合古義亦足見君之一斑矣君葬在天安龍頂洞娶南陽洪夔女生一女適李光迴光迴生子堯性又有幼女二人再娶潭陽田萬亨女生一男一女男鋼女幼鋼生二女亦幼銘曰

嗟惟尹君稟姿淑兮內韞外孚溫如玉兮孝友爲政行旣篤兮貞以自守操之確兮出游膠庠士友服兮一舉中選名馥郁兮清文妙藝拔流俗兮亨衢逸駕待驥驟兮屢蹶霜蹄終抑塞兮白首末宦祗蓄慝兮屈跡塵間非所欲兮歸田宿計病又促兮平生奇服戢一木兮老寄衰世每念昔兮乃如之人不復作兮

孤墳四尺草幾宿今攻文標誼抒余臆兮

掌隸院司評韓公墓碣銘

并序

公諱如斗字子仰清州人清州之韓自太尉蘭始顯於麗後連十二世爲公卿自麗至我朝蟬嫣不絕爲大族公曾祖曰生員天資與其配邊氏以孝烈並美祖諱孝仲同知中樞府事贈吏曹判書判書公二子必遠禮曹叅判必厚宗親府典籤典籤公娶慶州李氏府院君守一女以萬曆辛亥生公叅判公初難子取公爲後後生子如愚而以公爲長子叅判公配曰全州李氏監察申祿女公生而頴秀軼羣八歲出

句語驚人弱冠游場屋一歲九發解其譽藹鬱與姜文斗羅星斗齊名時稱洛陽三斗丁丑虜搶終有牽羊之辱公悲憤忼慷與伯氏僉樞公如海屏居江湖上隱而不出者十年以親命屈意公車垂登而輒不利蔭補繕工監役陞司宰主簿出監尼山縣廉約爲治尤究心田政民謂均平莫我侯最還爲掌隸院司評又出交河縣監以執法不撓忤上官自免去仍值甲寅消長之會遂歸驪江先墓下別自號曰獨醒翁與伯氏肩輿日往來名其亭曰二老婆娑愉佚自遠塵溷以尚子平高趣兼楊肆州美行世所希覩人無

不艷言之癸酉正月二十八日年八十三而卒公天稟介潔於一切世味澹然無所好蚤棄世長往黽勉仕塗雅意不屑故雖戚姻布列要津未嘗一與之交關然諸公推重靡間至白上請勿隨例試講蓋不以常調見待也已已宮闈之變公慨然曰倫常滅矣士於此時當有所處戒子弟不赴舉近例篤老者子孫祈請得恩資亦禁不許奉先克虔大耋之年猶自力將事朔望必拜墓臧獲有逃逸不見者來首實手指殆百之公以久遠難悉拒不納在外邑嫁女不資官物曰家累食公廩足矣外此營私不可爲也常

親近緬素諷誦忘倦尤酷嗜孟子時與人論難經義見解超詣當時儒賢多印可之文詞瞻蔚爲鄭東溟斗卿所賞八法亦豪宕可玩配南陽洪氏叅議瑞翼女生長法家有哲範生先公一歲卒先公六年壽七十八與公合窆於驪州興谷育一男伯箕縣令縣令生一男二女男重朝女適都正尹春教正郎李宜相重朝又生一男二女男命玄女適進士閔孝元都事李弘躋命玄生三男三女男生員正養次聖養敬養女並幼公有側出男可箕可箕亦有出昔我祖考贈議政公與公兄弟有陳雷之契以是宜顯自幼少已

欽仰公行業今於墓道之事其何敢不力謹爲之銘

曰 彼湖一曲屹然孤亭二老湛翁樂我頽齡倫義是敦
出處是經昏冥之世允矣獨醒江波滔滔永流其馨

通川縣監李公墓碣銘

并序

歲丁巳觀察使李公以旂節按湖南瀕行訪余楊州
之村舍泣且言曰滄不天年甫十五荐失怙恃泯泯
偷生以汙于茲幸賴先人休靈竊祿于朝得以任專
一方職視二品用錫我先考爵嘉善大夫吏曹叅判
兼同知義禁府事五衛都檢府副檢管完川君妣南

陽洪氏貞夫人惟我考載德韜名不克有於躬者因
是而大顯宜刻之金石以昭揭於後世謹具善狀一
道敢干於下執事如蒙哀其意特賜發揮將生歿均
受大惠矣余既屢辭終不獲乃按其狀而叙之公諱
山輝字君玉我 世宗大王別子廣平大君諱璵之
十世孫而右議政完南府院君諱厚源之孫也考諱
週忠勲都事贈吏曹叅議娶判書延安李時昉女以
崇禎甲申後四年丁亥生公公誠孝出天母夫人
疾革割指進血而無及血流溢不止數日幾至四五
斗觀者無不色動而猶擗踊哀號絕而復蘇以至手

臂痿痺榮衛枯削竟卒戊寅正月九日也嘗以先蔭調敦寧叅奉四遷至掌樂主簿出禮山縣監又監通川縣公素恬於進取黽勉奉檄壹以廉白自持殫精撫摩亦不爲俗吏銜要習有一方伯狂蕩無檢至公縣斂膝簡言語人曰吾敬憚其不敢放心公旣以孝自傷肢體孝固亡論而諸行亦焯焯於姑妹族戚曲有恩義交友莊而不狎在權要輒避遠之居家極儉約口不言生產事性敦厚忠信先質而後文亦以此訓子姓夫人觀察使處厚女早修婦行以承尊章生事葬祭克誠克虔佐夫子以正有嗃嗃之吉尤著良

轉運稱恒使餅壘不罄以調窮恤匱亡少恠雅不喜芬華見人有是每舉以警厲家衆公沒哀毀甚十餘日繼逝懿德淵識以節烈而終彤管之記斯無愧矣育子男女六人男涉贈完興君涵陝川郡守濩淮陽府使季則觀察女適僉正具熺士人鄭錫仁完興男顯祿大司憲完陵君顯福郡守男顯國女適金壽大又有庶男顯集顯得府使男顯億顯喆顯發女適進士沈鏞沈鉞觀察男顯白顯甲顯吉女適徐靜修洪樂命昌奎具出益慎克慎鄭出顯祿男權中直長女適進士沈鏞顯福男衡中叅奉女適張至翰任迨權

中男商舟商雨衡中男商夢幼未名若外裔多不能盡載我先子雩沙府君與公叔父芝湖公有淡水之契余於公又仕塗相接未及奉晤常以爲恨今因孝子之請追述遺美而衰昏寡識文字短拙不能彷彿其一二重可恨也系以銘曰
官一麾止壽五旬強行也克敦窮又何傷歛其衣履歸于衿陽三石山趾二美偕蔽厚積遺羸丕徽寵章
旒旒子姓卜後之長

童蒙教官宋公墓碣銘

并序

天爲斯文篤生我尤菴老先生又畀之好孫以左右

之先生常稱以祖孫間知己無祿先先生沒而畱下一子卽公也幼而資品甚美在行輩自超先生奇愛之年甫十三已已之禍作先生有耽羅行在途遺書錫以嘉名蓋取清陰先生勉先生語以期公也又以爲朱子臨終以一直字揭示後生爲已爲人不可易斯旣以遍戒子孫門人以公性稟剛直氣質爲近屬公外翁畏齋李公使以是提教亡何先生受後命卒公血泣奉受終身服行未敢少懈遇諱日竟夕悲慕以爲得列於人繫我祖賜言語動止一以取準每自策勵曰得無有違於先矩否常謂吾家自有正大門

路安事他求最惡世俗茅靡苟且之習當大義理源頭必正色明言聲氣峻厲利害禍福一切不較少遊京洛見崔鳴吉之孫冒攝皇壇祀卽抗章力遏雖以此流竄瘴海而無少悔痛先生之道不明於世手自校讐遺文次第印布又以埏隧之役尚有未備刻豎墓表而公遂卒其至死矻矻誠殫力奮亦可謂極摯耳矣內行克篤髫歲失怙長老勸薑桂不食色養母夫人有執玉奉盈之敬疾病至誠感神明有夢徵卽愈衰年持制毀瘠幾滅性以祖考同樞公大耄氣羸時或奉之於家躬釣採以供旨澹又體其遺旨遷

奉本生高祖墓常以考妣墓異室爲戚必合祔乃已凡於生事葬祭一無餘憾志尚介潔家居疎糲不繼而處之晏如每誦古人咬得菜根百事可做語始肅廟更新化先生冤亦雪而世道猶未免否塞公不赴公車杜門自守上之末年大悟斯文是非亟行褒誅之典於是公乃膺初筮命而雅意則不屑再值時事之變輒卽日引去如棄涕唾前後歷踐繕工監役敬寧叅奉濟用副奉事童蒙教官四任其在職毋問事洪纖必以奉公守法爲主戊申之亂人皆鳥獸竄公歎曰吾世臣也豈可草間求活惟當爲國一

歿耳公雅執謙抑未嘗以學問自命然而敦行誼謹出處篤守家訓攘斥世利嚴陰陽淑慝之辨振衰叔頹懦之氣則衆美該矣可不謂學乎公恩津宋氏諱婺源字景微其考諱晦錫同樞公諱基泰公娶于沙溪先生之門其舅判書金公鎮龜有子述相學相德相女適姜柱立公以丙辰十一月一日卒于驪州江上葬于水原萬義里先生墓之西麓也銘曰

余嘗讀昌黎氏贊孔左丞文有曰孔世卅八吾見其孫其尚類也莫與之倫今於銘公乎不欲易他辭以有云以著其實以颺其聞以昭其昧以永其存嗚呼

哀哉

義禁府都事柳公墓碣銘

并序

余少也則聞都事柳公雖屈於蔭仕乎涇渭甚明不數數當世固心嚮之公卒而與公長子泰明道輝同榜釋褐相友善益聞所未聞愈心嚮之暨晚歲入公門有潘楊之好則又備聞公內行篤至事後母盡孝友諸弟睦親黨類非今人可及始知公所修爲儘有其本盖心嚮之尤勤非特前日比也今公第五子大司諫復明抱狀來乞銘余以老病倦於文字顧於公何可辭公諱宓字受而全州人先故以名行顯至諱

永立諱稽仍父子爲觀察使其下二世諱允昌諱炫連爲郡守卽公曾祖祖也考諱世憲贈吏曹叅議娶宗室懷恩君德仁女生公幼有氣度從白軒李公問業文詞夙就以外翁罹禍隱痛于中退居鄉里讀古書不與人還往及寃雪始赴公車屢占發解終未闡甲乙西河李公一見推爲公輔器薦授繕工監役人以李公素簡亢少許可其所舉必得人益信公賢也公奉職勤謹規畫中窾官長甚任之陞尚衣別提改義禁都事是時羣壬滿朝倫彝晦熄公意常忽忽不樂惟用酒澆磊砢竟以是終 肅宗辛未四月十五

日也享年四十六鄉之人士無不奔走涕泣德善攸孚庶幾畏壘之尸祝矣公天資仁厚言議正平至於義利之辨確確乎其嚴也公先祖大諫諱軒有廉直之操其孫舍人諱堪忤奸兇竄極北十七年名重士林公恪守二祖之遺矩處末世而能自樹詩云無念爾祖聿修厥德公其有得於斯乎配正郎李晚吉之女亦 國姓通書史識道理訓子以義方有女士稱後公十九年年六十二而卒育子男女九人泰明承旨次子益明震明俱不仕恒明叅奉次卽復明昂明叅奉女適縣令洪澤普士人洪彥命縣監李重彥泰

陶谷集
明子愈縣令懋益明子愨王簿復明子恕進士昂明
子愿愨志熹愨爲恒明後熹爲震明後洪彥命子履
一進士履萬李重彥子駿祥生員愈子善養進士得
養遵養懋子敬養義養公又有庶子升明僉知秦明
庶子忠復明嘗按外藩推恩贈公吏曹叅判配從贈
貞夫人公葬在交河月籠山先兆次夫人附左銘曰
我觀世人鮮植志處下位者愈自棄公能飭操謝俗
累内外肉好斯全美云胡蘊抱一弗遂尚有餘羸詒
後嗣銘以貞之筆不愧用詔來許昭厥軌

贈吏曹判書金公墓碣銘

并序

公諱仁伯字君壽清風人曾祖友曾定州牧使祖汝
光大護軍考繼處士妣順興安氏司直光沃女以
嘉靖辛酉二月四日生 萬曆丁巳十月四日卒享
年五十有七葬于廣州王倫里公爲人身長八尺容
貌甚偉莊重剛明遇事善斷少物欲不以苟得爲喜
所與交盡一時名宿李白沙恒福申承旨應槩最相
善或稱其孝友或歎言論風旨或言才可用世皆深
知之言也處士公有學行兄贈叅議忠伯以孝著名
公家庭所得固異於人天稟自粹倫理克盡自居室
庸行以至生事葬祭一惟禮式有過亡不及家酷貧

處之晏如檢身飭操志尚高介未嘗屈節徇人見有奔趨勢塗者耻之若浼配安東權氏縣令大勲女吳贊成謙外孫性潔正理家有法度親屬雖顯赫絕不要索合德齊美允協內規後公十五年年六十九而卒葬于距公墓數里五峰山後以孫曾孫貴累贈公吏曹判書配從贈貞夫人有三男長益礪仲克字俱早天季克亨正郎仲有女適慶琬季有男澄觀察使澹生員混同知中樞洵同知敦寧況學生女適進士趙世達郡守朴尚一司諫任元耆觀察男構右議政樛叅判林牧使而叅議希魯左議政在魯右相出佐

郎正魯判書取魯正郎省魯大司成若魯應教尚魯叅判出興魯都事得魯益魯牧使出中樞男樞檇而迪魯檇出詹魯檇出敦寧男棹承旨栩枋縣監而最魯述魯恒魯重魯承旨出進士甲魯鳴魯爲栩後者縣監出學生男樛檇營將檇爲生員後檇楮而淵魯樛出文魯績魯檇出斯其爲公子若孫曾玄而其曰教官致萬王簿致一生員致仁致彥生員致良致溫致恭致恪致讓致長致福致祿致禧致誠致敬致健致信公五代孫也鍾厚六代孫也至若幼未名者庶出者及外出又極繁不可盡記公之先多單傳亦有

早世不遂者門族鮮少且公隱德韜光不克有於其躬而乃大收餘贏子姓之號號如此公卿法從磊落相望嗚呼豈非天道也哉銘曰

嗟惟公藹厥資溥問學凜操持有是實而嗇施歛餘祉于後詒墓之石我作詞列遺美永昭垂

大丘府判官趙公墓碣銘 并序

肅宗辛卯余出按嶺南得賢佐曰豐壤趙公公為治不務赫赫聲而自有條理可觀吏民得職閭里晏然余心語曰政如是豈古所謂循良者乎既還輒以颺之諸公間亡何公疾卒於官次余不覺愕然嗟惜惜

之非直為公為南民也今距公卒二十六年其子翼瑞抱狀來乞銘余年老文字非其任顧於公何可辭公之先胄於高麗太師孟自後簪組蟬嫣至公曾祖叅奉邦亮祖正郎仁亨考生員貴中雖俱未顯寔著美實生員之本生考曰時亨武科郡守正郎之弟也生員娶弼善韓續女生公早失怙恃能善喪持家自立有鄉曲譽年四十三始仕為繕工監役歷內贍主簿司憲監察活人冰庫二別提外歷木川縣監利仁察訪大丘判官大丘在嶺南即為余賢佐時也木川利仁之政亦視大丘廉使之褒聞相續居內則以小

心謹慎無公私譴大丘鉅府也非撥煩手難理公處之恢恢其才可見也及卒一境奔走悲號彌亘數里觀者聳歎公吏績既世所共知而家庭之行亦篤摯多人所難及云公卒于癸巳六月十二日享年六十公凡三娶俱李氏俱有婦德初配縣監廷輝女亡育中配通德郎頴女生子翼瑞斗瑞末配通德郎基昌女生子星瑞武科府使心瑞女適金漢平翼瑞有子慶棻女爲宋載百妻斗瑞有子慶載慶戩女爲金載厚妻星瑞有子慶廸慶億餘二子一女幼心瑞有二女亦幼公又有庶子冀瑞芝瑞蘭瑞公之葬在公州

鳴牛里以二配祔末配別葬林川黑城山公廷淹其諱而希文字也銘曰

戒後過者毋傷茲隧良吏蔽于是

通禮院左通禮朴公墓碣銘

并序

我國重門閥苟生於華胄望族亡論其人之如何榮塗峻級無不如拾地芥而寒峻孤畸之士雖文學才識過絕於人率不免蹇連困殫不獲展布其一二余未嘗不痛恨於斯今於林湖公而愈信公姓朴諱守儉字養伯其爲人寬厚質直平居渾渾若無甚可否遇事裁以義理截然也孝友出天爲鄉黨所敬服少

學於樂靜趙公力攻文章非先秦兩漢書不讀發而
爲詞浩瀚煒燁絕無輓近卑陬氣俯就場屋於各體
俱工聲譽藹鬱權貴子弟慕與爲交斥不許已而喟
曰此直技耳非丈夫究竟事遂摳衣於尤菴先生門
上自六經四子下至洛建諸書沉酣玩繹蚤夜矻矻
於大易中庸着工尤深旁及史編究心治亂見解超
詣立朝介然秉志當權奸柄國以亢厲忤意摘微事
謫配而無少悔及見廢黜 國母敦倫自恣尤忿憤
退居堤川之林湖與世相絕至甲戌 復位始起應
命出處不苟士論多之幹局通練智慮優長族節大

輒恢有餘地屢典州郡治績茂著又以冰蘖飭躬有
弘農暮夜之操然棲棲末宦無所遇以終叔季用人
之乖方豈不重可惜哉所著有絕韋餘編中庸演義
震史通考等書藏于家公義興人其先有諱瑾 端
宗元年擢文科歷官至靈巖郡守其後零替不振公
曾祖承宗祖文獻考景謨俱不仕而景謨以公推恩
贈左承旨配文化柳氏從贈淑夫人公三十四成進
士四十四登第分隸成均學諭轉學錄學止陞典籍
兼南學教授歷禮曹佐郎兼春秋館記事官改戶曹
正郎遞爲文兼宣傳官除開城經歷驟陞論遞復拜

戶曹正郎出爲茂長定州二縣監安州判官槐山郡
守拜梁山郡守晉州牧使俱不赴歷禮賓寺正左右
通禮司藝戊寅七月四日卒享年七十公有三配延
安金氏金海金氏坡平尹氏公與兩金氏同窆於堤
川泉南村尹氏同地而異窆子良旭良垕良漢良元
良遇良大良性良性庶也女適承旨李彙晉士人尹
德恒孫時晉進士時漸時義時夏時中時懋時敬其
幼者若外出俱不書銘曰
士常患不遇時厥或遇之多恨抱負之不盡償自古
而然於公獨何傷

成均館典籍金公墓碣銘

并序

粵昔 恭僖大王在宥之日方將陶鑄至治追軌三
五之盛靜菴趙先生起而左右之羣賢湊集一世聳
動旣而宵人逞毒斬伐殆盡世所謂已卯士禍者是
已其後思齋金文穆公正國手錄當時士類之罹網
屏壅者名之曰已卯黨籍不佞幼時嘗得見之至其
中一段有曰金秘字子修登已卯壯元連延已卯獄
被繫幸免佯狂不仕在家見人輒發狂語惟手不釋
卷晝夜披覽飢不呼食寒不呼衣進食則食之進衣
則衣之廢絕人事乃喟然曰此異人也亦可謂身中

清廢中權者乎中歲與公六代孫正郎公游始知公實爲我八代祖妣金氏之同氣昆弟而猶恨言行大致之未悉也今公遠裔將樹石墓前來請余一言余問公遺事其有槩略可傳者耶曰家乘軼不收亦不無一二耳剽者蓋公以拔俗之姿兼不羈之氣不肯屈首受書至年十八始發奮自勸讀書文辭驟進遂升上舍仍擢魁科直拜成均館典籍嘗師事金大成湜禍作以出郊餞謫行被罪又株連安處謙獄而得免自處以狂故亦無以加害也公年享大耋猶無恙雖不與人相接常獨坐長唏其微意可窺也公儀觀

魁偉筆法奇崛其自書試卷見者無不珍賞至己卯燬于火公以己卯釋褐試卷又以周甲歲失之亦異矣公號慕箕齋豈以佯狂之跡略符於箕子而然歟不佞乃起而言曰公之事蹟雖久而莫徵思齋所特書亦足以概想其風烈若家傳數語又與思齋所記相發何必多也公安山人高麗僕射肯弼之後本朝威靖公定卿平胡公漑俱至大官平胡子孟鋼登第爲承文院校勘娶仁齋姜希顏女生公仁齋工書母夫人亦然公之筆力厥有所自云公生歲卒年並佚不傳墓在安山斗尾浦先兆配全州李氏宗室五原

君寶貞女祔於公子元會遵遺意不仕女適尹顯庶
子元復元信元會三子長守溫次守恭季僉知守儉
後承其繁守儉曾孫叅奉始聲有志行號陶溪正郎
卽陶溪之子名定五當辛壬之禍有樹立其弟秀五
以操守見稱亦尚其世類也夫銘曰

父師發出明夷自靖公得是義用晦而正維慕而蹈
異塗同情聞韶褒袞允矣公評我追詩之式表遺貞

金山郡守李公墓碣銘

并序

故金山郡守李公我祖考議政公之從祖弟也我李
世以孝友清謹聞公又天賦純懿事父母克盡愉婉

有順無違及喪持制甚固廬墓終三年視彘弟如一
身以古春津爲法爲人方嚴好氣槩遇事勇決爲內
外官律已廉簡惠而知要人謂不墜先故遺軌云其
先肇籍龍仁訖麗朝五百禩簪纓不絕入我朝諱士
渭諱伯持仍父子致位崇顯三世而諱績司僕寺正
有文武全材值燕山荒亂不底大用贈都承旨公其
承旨公之七世孫也諱寅司贍奉事諱希賢承旨公
長子派生員啓仁金溝縣令諱士吉次子派也奉事
公無子取金溝公子爲後諱後俊 秦陵叅奉娶全
義李氏掌樂正厚基女生公諱汝岳字子詢年三十

陸谷集
七中生員試仕爲 陵寢郎三遷至廣興倉主簿轉
工刑戶三曹郎又爲掌隸院司評義禁府都事出典
陽川陽智信川金山四郡邑在信爲方伯所困帶拂
袖去民遮截不能得涕泣助行資斥不受金山之政
尤殊異農巖金公以繡衣行部察知之面加稱歎公
晚見時事多虞不樂宦塗賣京第携其弟放跡江湖
間屏絕世紛迥然自適至甲戌十月二日卒年六十
二葬于衿川石峴與配全州李氏合祔元配清州韓
氏無后別葬陽城子世舟女適府使任遭士人申錫
夏世舟天歿有繼子宜得宜得有三子普謙普觀普

臨余門子也長老道盡殘生獨存強拈枯毫記公墓
石愴念誰昔其何以爲心哉系以詩詩曰
趾先承宗不愆其躬清江額角亦見遺風謹謹自治
于外于中晚節江湖荆花映空優游和樂志則恬冲
允矣美實昭示無窮

工曹正郎鄭公墓碣銘

并序

公諱洵字長源系出迎日松江鄭相國諱澈之玄孫
也曾祖諱宗溟擢魁科官至江陵府使祖諱潁有高
世行與尤菴先生爲道義交舉遺逸官至侍講院進
善考諱普衍志節卓犖師事尤菴專精聖學早世娶

觀察使閔光勳女生公公以大家子稟資俊嶷爲士友所期許余嘗奉際許乂然猶未能深知之也今見其第三胤觀察公所爲狀衆美畢具有古人所難能者夫揚人之善猶恐或後古君子事也余雖庸陋其何敢不勉謹一一備記以明告後之人公生一朞而考沒稍有知悲慕如不欲生以尤菴視猶已出卽委身其門朝夕觀感又學內舅老峰公事之如父事慈氏盡孝舞彩弄雛爲萊子戲遭艱哀動路人痛不識嚴顏求得先蹟葺弄展玩不衣輕暖不與讌樂日必謁廟在鄉又日上冢推其愛以及老姑見者疑於子

一姊先逝取育遺稚割田以畀使奉其祀疎遠之族亦加撫恤歿資歛昏助費性喜施鄉人多待以舉火嘗見路有呼寒者卽脫衣與之疾革聞素無分者來告急喉語亟令覓副謙恭寬厚不以伎刻待人至其嫉惡如讐天性然也飭躬以禮理家有法教諸子甚嚴常言士大夫心事當如青天白日爾曹識之才器過人閔公鎮遠每推爲廊廟具早中司馬承慈訓遂斷公車跡蓋亦追述父祖兩世志事而以其義凜春秋平生不近燕市物其於尤菴至心炳然涪陵之行亟往從之又隨後命奉輅而返先公有同門密友後

狼狽甚爲士林擯斥公處之有方亦以稟議師門也其登小科也例有官戚問候公自出閔氏於 聖后爲戚而不敢通謁自外徑歸實遵松江公遺則也及已巳 遜位經紀盡其誠痛哭拜辭而退公又淹儒巾終無仕宦意丙子長銓者採公議除 長寧殿叅奉公意殊不樂而不欲標異勉應俄自免去已授童蒙教官慶安省峴二察訪司憲府監察出監永春縣治有體要獎革民蘇爲不悅者誣捏罷歸堤川先墓下築室而居之遂菴權公來訪從容手書堂額又書蠖屈求伸龍蟄存身八大字以贈其致意深矣後自

平市令轉工曹正郎爲衿川縣監既歸不復仕公晚多疾知舊勸稍近京輦以便醫藥公愀然曰吾當瞻依松梓以畢餘生何忍離此一步也前此自卜玄宅取近先墓及葬槩不違雅意生歿愜願寔公孝心攸感也公之卒在 景宗甲辰九月二十九日享年六十六後以子貴贈吏曹叅判醜青松沈氏從封貞夫人夫人監察若溟女仁孝淑惠德行超倫語其最可記者女子旣行多外本家不顧夫人則其心至老如一本宗祠屋燬久未建慨然先爲之倡諸沈承意協助遂噲然告功乃一口歎曰累世未成之事老夫人

一朝而辨戊申觀察將發討逆之論時火色可畏夫
人勉之曰人臣立朝寧禍福是懼吾當與汝兩兄先
歸夫子墓側即日賃舟東下嗟乎哲哉生先公一年
沒後公十二年壽七十八祔葬於公子泰河都事觀
河郡守益河方爲慶尚道觀察使復河女適李蓋佐
進士李著德直長李普萬泰河子渠觀河子楡益河
子櫛進士櫛幼者外出並略之銘曰

烈烈文清秉直如絃抱翁承之麗澤高賢有士尚志
抱負莫宣公生伶仃大老攸隣保育將護申以周旋
瀛舵楚紉公竭誠虔士友親就媼黨後先云胡連蹇
又嗇其年哲媛媿休彤史可編馳慶于嗣建節朱塤
徵報斯在光徹幽泉我詩孔碩篆厥豐鐫

刑曹正郎金公墓碣銘

并序

我朝不幸士林連受禍殃然其氣節不挫如石壓而
笋出 祖宗培養之化儒老教思之澤不可誣已
景宗元二之間羣兇堵立惟殺戮是尚上自卿相下
至韋布以及童孺婦女僇隸軍卒無不夷滅殆盡禍
事之酷千古所未有士皆惴惴不敢出一氣唯金公
定五罷縣宰里居公州毅然不動一髮當疎齋二憂
兩公轉車之過卽綿芻哭奠傲視礎鉄時羣兇旣逞

志施快名之曰討逆稱慶設科有同里武人占是科
公惡之飭里閭勿使接應兇徒訶知之亟請追公鈎
問事機叵測公對簿不撓正言直說屢迫而終亡變
兇徒恚甚顧無如公何遂竄之淳昌郡於是聞者莫
不壯而義之名一日傳四方余方遠謫關塞客有問
余者曰金公是何如人而直犯火色乃爾余曰是固
當如此在昔神武之禍餞金大成湜謫行仍佯狂逃
世者有之夫夫其耳孫也乏本醴源烏得不然且金
公曾倡起士論斥毀經之相又上章聲罪無母之
賊其氣節已可見矣聞者唯唯其明年 國家更化

雷雨作解公得放還余忝長天官採公議首復舊銜
三轉爲義禁都事俄陞 社稷令改刑曹正郎久之
出省峴察訪亡何戊申之變作黃公璿按嶺南與公
合謀禦賊公遂團束軍伍修戈矛峙糗糧誓歿殉國
爲書訣子弟奮袂而起已而嶺賊敗衄而黃公暴卒
賊勢復張事無可爲者公仰屋長吁代黃公莅事者
嘆公寘下考公浩然而歸杜門高卧名其軒曰老圃
絕當世念時輩問訊不報謝有欲來訪避不見公時
年七十仲季二公亦老白首鶴髮鳩節日夕湛樂風
流可挹一鄉豔稱以乙卯十一月十三日疾卒享年

七十六葬于溫陽新豐里配全州柳氏佐郎偉女早卒無育繼配信川康氏士人侯翊女有二女適俞彥燮閔瞻公以弟之子命集爲後命集生五子曰穡曰獲餘三子與一女并幼俞有一女幼閔子孝昌餘一子一女并幼公字汝一安山人胄出高麗僕射肯弼本朝蓮城君威靖公定卿判中樞平胡公漑仍父子顯赫平胡子孟鋼文科校勘校勘子秘文科壯元卽佯狂者號慕箕齋公六代祖也曾祖諱希賢宣教郎祖諱在鍵通德郎號雲峰考諱始聲 光陵叅奉號陶溪兩世俱以行誼聞妣坡平尹氏通德郎坪女公

於 肅宗己卯中生員試壬午除 徽陵叅奉再轉掌苑奉事繕工直長丁外憂憂吉除平市奉事轉掌苑直長宗簿主簿司憲監察出監知禮縣政理得宜吏戢民懷忤方伯罷歸仍值時事大變遂有鞮屨之行公內行純至痛早失恃事陶溪公盡孝多人所難及尤力於奉先在南縣盛設具祀威靖侍祭器樹表碣亦嘗官奉慕箕公廟主以祭約諸宗歲一祭親盡墓與二弟不分宅閔其貧別爲析箸伯氏天物無子嫁孤女而育之母事老妣以未及專城養爲恨教子弟必循軌則禁勿言官長是非朝廷得失性謹慎自

奉樸陋賦役必先於小民關節不通於達官陶溪公
立鄉學略如孫明復故事文教蔚然公仍修明之久
而不替尊慕尤菴先生愛好農巖讀其書而深味之
哀趙中丞聖復冤護視加等語及必涕風義之篤如
此噫已卯辛丑禍亂相望公家先後遭值俱有樹立
迎哭兩轎出郊餞行之義也屏居暗噫托狂自晦之
心也公可謂善繼善述者矣余自出校勘與公事契
甚厚今於墓文之托安可以老病爲辭銘曰
世常恨挽近士趨之骹骸鮮能追古人之風節今以
公觀之奚必多遜於往哲如使我比挈今古而眇論

允合寘公於黨錮諸賢之列

通德郎安公墓碣銘

并序

公諱絢字文甫竹山之安其稱盖久有諱漢平社卿
克仁顯于麗淑老望之孟聃顯于我朝孟聃尚主生
四子都正桑雞公之先也四傳而景濂僉知中樞中
樞生大楠通川郡守郡守生廷燮司僕僉正配晉州
柳氏公生於天啓辛酉至六十六歲以九月九日
卒葬交河埋金峴後配坡平尹氏附左前配星州李
氏別葬楊州松浪里兩配俱無子繼子相奭中司馬
先公物有一男二女男允成女適柳容閔景洙允成

有男宗曾宗茂宗耆宗秀女適李德用李慶昌李沆
閔範洙後出繁不能記公天賦篤孝幼失恃能善喪
長老稱之稍長治詞章明經學俱瞻練屢舉發解性
充高自待不苟嘗入講席垂登第少有舐滯卽起出
考官惜而挽止不聽及除外艱年猶未暮而卽輟舉
曰親不在誰爲爲榮遂歸交河月籠山下結茅而居
之足跡稀到京師力穡致贏不營求於人不許雜賓
來往喜酒而不及亂祗以適意李公敏叙雅有契欲
官之試公意公怒有言李公歎曰難矣哉此人平居
繩墨不頗每儼然默坐子弟嚴不敢仰視然處鄉務

和洽調飢救匱不計家有無以是得里閭歡蓋聞公
以小學檢身雖其姿稟甚好而學力亦不可誣矣余
見世人達者夸溢自肆而窮者又不免隕穫卑屈如
公之爲豈非難得於今世哉是宜銘銘曰
士而尚志鄒聖垂訓末路滔滔鮮矣安分干人封已
志於何有淑哉夫公不染俗曰西河一曲我稼盈畝
曷以寄趣樽有美酒

沃川郡守安公墓碣銘

并序

孝之於人大矣哉淑一身源百行推以廣之無所處
而不準出而施於事沛然無有窒礙古之臻是道者

可一二數而世及衰末人心大壞晨昏之際不能盡其節者亦多矣唯安郡守允升有可稱焉公自在髫齡事父母有深愛嘗值疾革跪向天祝曰願愈疾願愈疾疾已人謂孝感亡何荐失怙恃號痛欲無生持制之固長老莫及移孝伯父恪謹不懈見同輩受父兄責泣曰彼有受責地繫我獨無平生自處罪人衣不華鮮食却腴雋晨必謁廟未嘗一廢慙於祀稍愆時卽引過不食祀之日哀慕如初終在官尤致豐腆每手察其蠲潔人或語及先公輒汪然加待同先庚者賤隸罔間晬日不受饗民有棄母不養者諭責甚

切卽感悟迎歸以廉約飭躬謂是吾家傳遺法如不允蹈卽爲忝先先公與伯公游二宋先生門爲士友所推公見時事紛紛不欲入是非場口不及雌黃人有非情之誦但笑而無辨他日以尤菴集一帙授諸子曰爾曹不可不熟觀以究義理之極致此可以知公心事而亦可見其繼述之孝矣公爲人溫良寬厚旣以孝道爲本源而事姊如母以及羣從弟姪遠戚疎族遇之咸得其道宰邑也求丐杳至畱不去者至十數人一不皺眉誠心酬接性仁慈無伎害心濟飢恤喪用意至到病末俗分朋馳逐以論議相高每以

取友必端戒諸子官餽必先冷厨而後貴門家甚貧處之晏如居室服御敝而不改尚念及國事燕居長歎有漆室癸婦之憂其忠悃亦加人數等矣為文典重尤工駢儷稱為場屋高手年三十一中司馬試四十四始仕為翊衛司洗馬入侍胄筵敷陳明切同入講臣極口稱贊世子亦為之改容陞冰庫別提改刑曹佐郎陞正郎一以擊剛疏寃為主出為洪川縣監戢奸吏課儒學申嚴國禁不避觸忤善荒政為一道最膺錫馬典忽有臺劾朝廷即除戶曹正郎直其謾仍拜沃川郡守沃凋劫甚公力為振刷邑遂完聲

譽方興時議將昇右地遽屬疾以卒乙卯三月十二日也享年五十一葬于原州雲谷里公竹山人字子猷曾祖諱廷燮司僕僉正祖諱縝禮曹叅判考諱相萬義禁都事妣延安李氏僉正世基女配德水李氏通德郎靖女生五男一女男宗高宗說宗哲宗傑宗述女適魚用大孫男六人并幼唯宗高子權長成銘曰
孝於親忠於君惠於民廉於身衆美畢臻斯可謂之
好人

贈承政院左承旨趙公墓碣銘

并序

丙子虜亂人士之歿於江都者亡慮累十數其夫婦
同歿節義成雙者唯沈忠烈公覲最爲表著有趙公
諱廷翼亦與其配李氏同避兵江都及虜大入趙公
語其配曰我家世傳忠孝臨難不可苟免卽引佩刀
自刺李氏急奪而先歿之公治殮訖虜遽逼公憤罵
不屈遂亂捶射公因自投壑以歿公兩弟來求原隰
之哀見四五矢着膚齒挑而拔之葬于通津元通之
先兆公歿以丁丑正月二十五日而李氏以其昨歿
事聞旌閭後褒贈公左承旨李氏從封淑夫人公字
翼之平壤人高麗貞肅公仁規忠肅公璉文靖公德

裕俱貴顯事載之史其後按廉使猶麗亡逃隱清溪
山公其七世孫也曾祖諱溥慶州府尹祖諱昌生考
諱寅不仕光海朝退居通津自號江湖散人娶縣監
李韓女以 萬曆己亥生公公姿高而氣俊容貌端
秀少負場屋聲慕古人大節篤學力行號樂道齋內
行淳備親沒廬墓終三年手辦具祀享少歉意輒自
撻當析箸盡推與昆弟以孝有錫賚末後樹立未爲
無所本矣若夫人之倉卒捨生亦可謂千古之節烈
而公刑家之化又可見矣夫人都正濬女與公同年
生月日差先後子猷同入江都欲從歿公呵止之曰

汝以獨子何可死遂不得如計後登武科至兵使女
適南宮任猷有五子世雄府使世傑僉知世發世成
府使世基女適兵使李行成李萬甲統制使金重元
庶女二人爲嘉善李潛妻判書金禹錫妾南宮任子
瑄琥琬璋世雄兄弟之後繁不可盡載就其中登科
甲者曰府使健兵使儼脩俊左尹儉統制使儼都事
偈武而掌令佺文也察訪倫萬戶倓武而庶也曾孫
以下又多連捷武科制閫佩符與爲武選顯職者相
望於朝列盛矣哉豈亦公未食之報也歟銘曰
遇亂捐軀是謂之節同時併命閨閣尤烈以文以武

子姓多有欲徵善報盍觀來後

黃海道兵馬節度使趙公墓碣銘

并序

趙掌令佺爲其曾祖承旨公祖節度公謁墓文余旣
爲承旨公銘矣又銘節度公而并以叙曰猷公諱也
汝獻公字也平壤公籍也貞肅公仁規忠肅公璉文
靖公德裕平簡公猶皆顯於麗平簡又爲麗守節俱
公之祖先也府尹溥將仕郎昌生江湖散人寅公之
高曾祖考也贈左承旨廷翼與配禮安李氏同死虜
難者公之考也 天啓辛酉公降生之歲也 顯宗
乙巳公復魄之年也全義李氏以立節昏朝號石灘

慎儀爲祖者公之配也青陽杻峙公與配合祔之地也以甲申武科歷拜宣傳官訓練主簿判官僉正加里浦僉使都檢都事經歷平海郡守清州營將寧邊永興府使全羅京畿水軍節度使黃海兵馬節度使吉州牧使者公之宦蹟也白晷豐厚聲音洪亮美鬚睦諸親撫恤窮窶咸盡其篤誼平居無疾言遽色身不設情容口不出褻言處家欽欽如在公朝者公之行蹟也始業儒事而勇力顧絕人任氣不羈當江都之亂欲從死承旨公戒之曰吾以世祿臣義當死汝

以獨子不可死遂不敢違倉卒被擄去而猶以氣自厲無所挫屈嘗潛殺三胡密約華人擊斬金汗頭投入中朝不果一日困睡夢承旨公言今日當有人尋汝覺而異之俄有二舊奴來扶而泣謂公叔父爲贖公資送遂隨而還時承旨公葬隔晨忽聞公哭聲自遠而近一家驚喜如得從天而下萬里生還得及葬日人以爲孝感此公遇難時事也 仁廟命諸讐虜人業武公乃投筆志在復雪習弓馬以鍊藝讀兵書史傳以究合變其爲宣傳監鎖禁門力拒闌入官上嘉其守法特命超叙平海之政一境稱治褒階

緋玉 孝廟有大志飭厲兵事創設營將公殫心修
敷罔有不弔有紬帛之賜寧邊及畿海二閩以故不
赴永興南閩吉州俱有名績大都以治兵練卒爲先
務公歷職中外聲實隱然鄭公太和李公浣金公壽
恒閔公昂重趙公啓遠金公佐明皆倚重公及聞其
喪深痛 國家失干城才公聰明絕人觀貌而知其
隱聽言而察其微決疑解疑沛然若無事射藝特精
發無虛矢少日又畱虜中審察形勢默有籌畫當
聖心奮厲之會擬將憑仗威靈以伸至痛而 弓劍
遽遺萬事瓦裂痛哭歐血如不欲生竟齋志以沒可

勝惜哉此公立朝之事蹟也至若齊躬心謹禴祀一
不以有無干公壺德聿修于名祖亡愧此又哲媿之
行蹟也子世雄府使世傑僉知世發世成府使世基
女適兵使李行成李萬甲統制使金重元庶女爲嘉
善李潛妻判書金禹錫妾世雄子健府使佺儼兵使
儼女適水使洪德望庶子佺倫察訪僂萬戶女爲叅
判李鳳祥妾世傑子修兵使女適進士韓宗哲世發
繼子儼統制使女適李世仁許曇尹沃世成子儼左
尹儼出繼倓兵使女適武科金重國庶子倓女適李
相齡李燁世基子佺僂都事庶子佺女適朴道謙李

可祥曾孫以下及外出幼穉繁不能記而公後承文科則佺武科至十八人之多亦可謂盛矣此公子姓也銘曰

聖王奮義豺豸應期公抱隱痛樂遭丕時參差綿繡大樹遽萎汾晉雲水愴極杜詞我追作銘用寄遐思

承政院右副承旨申公墓碣銘

并序

公姓申氏諱思永字子久平山人其始太師崇謙翊麗朝開創甄萱之亂爲主歿節如漢紀信世載厥美至御史大夫君平翰林琿判書浩俱著名入我朝有大司成諱敏一早學成文簡公以經術直道顯卽公

高祖也曾祖諱恂鍾城府使贈吏曹叅判祖諱命圭執義贈吏曹判書考諱鉢成均生員贈吏曹叅判娶漢陽趙氏生公爲人眉宇疎朗儀度秀雅有才格在家塾已爲長者所賞嘗值鬼火羣兒驚走公獨直前嚮之火自滅人益尚其氣魄已卯升上舍游太學尤負雋望選除翊衛司洗馬例陞至尚衣別提轉監察工曹佐郎出爲新溪縣令亡何棄歸閉門不求仕夢寤金公亟稱之居六七年拜全州判官府居營底物衆事煩號稱難治公應之恢恢民至立石頌惠還爲戶工曹郎會兇孽闖逞呈病不出仍下鄉今上初

服登進善類公爲主簿正郎僉正等職及時事驟變遂不赴高陽郡復歸鄉庄自後逆亂相續國勢危疑公低回未班意益不適癸丑以太僕僉正擢文科公時年六十四而顏貌渥丹髭鬚不變人不覺其老也遷宗簿正拜司憲府持平是時柄人籠絡一世士多劫劫改操而逆案因而漸弛公不勝慨然首劾其尤不厭公議者數人人稱老臺風采之可觀云歷拜掌樂正掌令獻納司諫時改摹世祖影幀公爲之郎叙勞增秩拜兵曹叅知再入承政院爲承旨以卒丙辰五月三十日也公素剛無疾病偶患微疇奄至不

淑登第僅閱三歲世共惜之與配咸豐李氏合葬于楊州蘆原先墓下有男女各二人男駿縣令暉說書出爲季父後女適進士李邦協士人沈師儉駿男光震光復光履女適俞彥人李貞祥暉男光益李男潤成宣傳官潤英潤貞女適金柱漢沈男有鎮餘皆幼公內行克備推以爲衆美裕如也累經世變去就不苟其在臺垣遇事必言綽有先故亢直之風居家惡衣弊席終身亡易其恬約之操又可見末世混混何處得來余少與公聯齒相好晚而益有以知公至結朱陳之約未及成而公遽逝每對光復自覺愴然興

思光復卽余女婿而與公約婚者也今縣令君類公行蹟要余文甚懇噫余雖老病廢筆研於公烏可無一言遂爲之銘曰

夸毗自鬻宦子常態公也不然獨超流輩晚榮旋萎識者攸慨有美載石尚質百代

刑曹佐郎李公墓碣銘

并序

族兄佐郎公於余兄弟倫次年最高長余十九年昔唐人重倫次稱號人必以此据此余爲十四而公則當稱大矣年之先後旣相遼絕言行事爲之未盡詳固也然公之祖考戶叅公以遺腹育於吾曾祖吏叅

公以是余視公如堂從目之未及者耳久熟焉今當墓道之事請以熟於耳者叙列之以告後之人公孝友至性出於天得事親也一心匪懈恒有執玉奉盈之敬罹艱哀毀過節積致病崇而不恤也烝嘗之事尤盡誠慤同氣七人撫愛篤摯析著之際捨饒取薄二叔父生并歲相長大而事之甚恭幼老若一內行之絕異如此平居欽欽如對大賓口不出調諧手不近博奕常持程門禽獸之戒知舊莫不敬服操履之飭修如此餘事才藝亦有可觀爲文詞絕精緻尤長於儷語爲任尚書相元所亟賞任雅稱工於儷者也

嘗宰東邑雖以忤上官見貶而民則頌其惠至於填道出餞立鐵碑以表去思其吏績之著稱又如此公所自修者既無所歉而獨奈命不侔身前後苦由之兇至十二年之久以官則六品而止以壽則五十減一此族戚之所共傷悼者也公諱宜茂字盛甫我李系出龍仁世派已見先墓諸刻公考世萬娶達城徐氏忠肅公渚之後公生四十升上舍仕歷繕工掌苑尚衣司宰諸署稍遷金吾刑工曹郎除楊口聞慶二縣監聞未赴戊寅六月十一日卒葬于廣州黔丹山初娶正郎俞樛之女生一女適沈尚賢生二子鉉鍵

俱進士繼娶居昌慎氏莊靖公希復之後生二男二女男普遠叅奉普運縣監女適判尹具聖任士人尹東質而光祚尚祚明祚成祚陽祚若海祚二子出兵使具善行進士善慶尹光洙光泗光濂光洛二婿出也公生前困厄極矣而身後子孫之蕃衍至此其亦天之定也歟銘曰

我李修行孝友爲本公繩世美用是自勸神之聽之錫爾胤慶生兮不遂其報也永

昌城府使朴君墓碣銘

并序

肅宗乙亥我先君忠正公承命試文武士於關西得

朴君東樞於弁韜中寘之乙科第一人歸語不肖曰
吾今行得一俊武前途殆未可量惜其生於遐陬未
得發身所也其明年君始入京師謁先君余接其顏
貌聽其言語不覺懣然心醉時君年甫二十七而膽
略才識已有老成氣度非鄉曲寒譴所及余大異之
亡何又中重試才名日盛先輩重人無不激賞歷職
守門將軍器主簿判官監察除熙川博川郭山三郡
守碧潼縣監定平昌城龜城居昌三水五府使而定
龜未赴其始出熙川也年最少未更事方伯初甚易
之及與之語論說劈畫悉中肯綮乃改容謝之時年

事告歉君賑政得宜人免於飢孽謳謠於道途患氓
俗質質選隣士有行者爲塾師俾教禮節一變陋習
後宰累郡隨著異效又能威制豪強頗以猛酷名而
君則自有弛張故民甚便之終無怨言如嚴於居昌
而寬於昌城者以南固嚚戾難化而塞則懦弱易制
也其有識慮能操縱多類此以此到處游刃沛有餘
地七州頌聲衆口如一使家褒聞踵趾相躡蓋君出
自邊鄙特以才力自奮長不踰中人而智謀出衆精
神自別明闇果詣遇事無難昔程夫子言韓信之多
多益辦只是分數明如君者豈非所謂分數明者耶

陸名集
朝廷亦知爲可用之才擢拜平安虞候又爲兼司僕
將出慶州營將未赴會逆賊起於南無可防禦者咸
薦君可使君故爲余幕裨 上以問余余辭謝對曰
臣素不習兵事雖痛聞治績而可任征討則臣固未
知請問于將臣將臣一辭贊之 上特召入諭之曰
以爾爲京畿忠清全羅三道繼援將錫爾甲冑一弓
一矢三十其往討賊無敢替予命君頓首拜受至全
州而還君素有制閩之望旣自南還連除順天尚州
營將相臣宰臣交口薦可任閩寄本兵欲首先通擬
湖南閩任有沮之者不用君才無不周足當一面而

外和內辨非其人雖大官要權殊不屑就仕塗多齟
終無悔改亦可以見其人也君少爲我先君所薦拔
余待之如戚屬權公惛僕兄弟金公有慶雅重之以
爲緩急可仗君字弘機世居義州爲著姓父護軍尚
賓娶李氏女生君後以君征南功贈叅判配從封君
娶於金生二男一女男澂演女適尹泓而原恒仁恒
日恒與性恒二男出也君以己未二月十七日卒享
年七十葬于義之延平山銘曰

於赫寵光三道之將莫云蹇滯遭際寔壯七境美政
流澤亦長吾何費辭君自不亡

軍資監判官鄭公墓碣銘 并序

窮村鄭公諱績輝字景由迎日人圃隱先生十一代孫也曾祖儁典籤祖雲翰麻田郡守考元徵玄風縣監妣漆原尹氏都事正基女生而穎秀英邁絕人三歲母夫人戲示錦囊曰汝欲之乎卽點頭遂與之以賚日用物件有索輒進長老奇愛之已荐遭內外艱自痛罪逆哀毀過節待小母盡誠無異親子弱冠束脩尤菴先生門尤菴獎許特深期以遠到公嘗以圃隱墓道無樹爲歎請文於尤菴尤菴感公向先至誠卽許之顧謂左人曰圃隱有孫矣平生潛心大學書

專精心經近思錄世數尤門篤學士公未嘗不在其中辛酉尤菴自海上還入對舉薦公甚力老峰閔公昂重亦同辭遂除 恭陵叅奉轉奉事直長至王簿由監察出監連山縣三歲罷歸歷平市令軍資判官翊贊又出監山陰縣亦三歲而歸 景宗癸卯卒于公州之內舍享年七十二葬在鎮岑厥有二配前配昌寧成氏進士夏聖女生二子鍊鉅二女適申愈宋會源後配慶州金氏進士履賢女生子鏤女適李匡濟權燾公嘗謂吾以先蔭登仕若不守法奉公是爲辱先自爲一命之官卽斤斤以繩墨自厲母敢分毫

差忒暨爲縣宰尤律已絕私一以束吏愛民蘇殘祛
弊爲務豪右讐伏不敢逞一境安堵至爲之語曰昔
有召父今有鄭母尤嚴奉聖廟必以肅敬將事連山
距師門近頻頻往侍函丈隨事咨稟尤菴有書獎之
曰旣奉文忠先生祠板來莅元敬兩先生講道之鄉
此實斯文盛事又嘉公奉聖廟事曰今世此事滅裂
是不知慢神與虐民同科也今聞吾友亦畱意甚知
先正遺教之有在也宋公奎濂爲方伯凡有疑獄必
歸之公嘗待以優禮以慈祥縝密無愧循吏褒聞于
朝公之吏績固已播在中外而亦不免燕岐之謫此

則尤菴被禍時事也然以其爲一時微眚故兇黨亦
不得深嚼卽被放還尤菴之赴謫耽羅受命楚山皆
往迎中路取惡尹拯之爲人以其爲惡浮邪怨旣與相
絕又勸從弟續祖絕之公篤信尤菴晚年尤加慕用
見李厦成之構誣尤菴尤憤疾之欲上章力下以士
論不齊而止然其耿耿不但已也因此除富平宰而
亦不赴後自山陰歸遂卜居於公州之儒城仍不復
出與續祖同居續祖亦有學識非凡士也相與講磨
不怠以爲樂公於尤菴門徒中取與芝村李公善於
遂菴尊仰有加焉噫公以大賢遺裔服事華陽江漢

秋陽之思老而益切一時士友蓋莫不推尚則如公者其可謂法門之修士澆世之端人也夫銘曰
於惟鄭公出自忠義伯之家其德孔嘉其懿孔多使後人稱之曰吾見其孫豈不爲千載之姪

義州府尹俞公墓碣銘

并序

公諱命一字萬初杞溪俞氏也鼻祖義臣著節革命時更麗朝歷載五百愈遠彌昌至我 中明之世有景安公汝霖肅敏公絳仍父子職至六卿號稱名臣肅敏四世有謚文忠公榮者以經術直道爲士林推重官至亞銓號市南公其市南弟監役棊之子也監

月

役公娶全州李氏進士生寅女後以公貴贈監役公吏曹叅判配從贈貞夫人公生而儁異長益砥礪文行自超倫類市南公每加稱賞期以遠大年二十二並中司馬兩試三十一始仕爲 章陵叅奉陞典獄奉事亡何斯文禍作世道剝喪公屏居龍湖觴詠以自適復由長興奉事轉司導直長又拜金吾水曹二郎公雖棲棲末宦非其好也至辛酉始闡文科年已四十三矣公素負公輔之望及折號李公翮語官度支者曰公之此座今得其人矣連除禮兵曹佐郎遂入司諫院爲正言劾都承旨金禹錫冒嫌附勢累爲

持平正言遞爲騎省郎間掌試陪都得公明之稱宣諭海西有疏獎之譽是時鑄積之徒挾楨柁爲逆雖新經誅討而餘黨疑懼金益勲方任譏察事時輩附兇黨切齒益勲使掌令沈極誣公黨益勲極素駭妄不識字一世莫不鼻笑之朴泰維侵攻尤菴舉朝無一言公憂慨下斥明切帶三字銜學儒金盛大斥尹拯其黨罰之宋公奎濂白 上解其罰掌令洪受疇劾宋公公劾遞受疇護受疇者又劾公公累出入言地論事侃侃積忤時輩故受困如此矣公久屈名塗公議咸惜及議都堂不悅者憤私黨之見漏并枳公

以相當陞掌令洪受疇疏救尹拯詬辱先賢公舉劾其罪 上賜批嘉獎特施逆裔之典俄以司諫加階拜義州府尹公憂邊圉疎虞以謹約條嚴關市爲務而不欲久處脂膏未踰歲辭遞入承政院爲承旨是時朝著潰亂百怪並出逆宗杭舉止非常一如向日楨柁之爲而被 上恩眷異甚 官闈不嚴內寵日盛似必有難言之憂公在近密日夜吁歎殆廢寢食見事機轉益危惡隨事匡益力挽頽運知不可得則自求外以出其心亦戚矣公出知安邊府安亦邊邑也衣逢掖者不肯事儒術惟武力是尚不知親上事

長之義公慨然以興學養士爲己任業文飭行者競起從化習俗爲之一變亡何棄歸時 母后幽廢彝倫斃絕公悲憤涕泣寧欲無生竟以庚午二月二十一日卒始葬廣州後改窆坡州坡平山下新谷負丙之原以夫人昌原黃氏祔夫人觀察使儁耆女婦德咸備有四男德基復基俱進士億基僉知宅基進士德基有一男二女男彥哲牧使女適奉事南道振縣監朴師衡復基有三男二女男彥燮彥質進士彥述文科察訪女適李倚相姜聖興億基有二男二女男彥玉彥肅進士女適權致誠李碩昂宅基有三男三

女男彥吉彥直俱進士彥烈女適進士鄭震鵬任錫周柳東運公居家篤孝友之行立朝秉公直之節才猷足以需世詞藻足以華國以朴素廉約自厲以恢疎坦易自持又得閭內之賢助成冰蘖之政人謂無忝爲市南公佳子弟庶幾追躡遺軌克恢前烈而市南則始蹇終亨聲施至今公雖翹英於更化之初而晚值鷺梁之世抑塞憂傷以沒其身豈非命也吾先君雅與公有淡水契誼分甚厚今當墓道之託不敢以老病垂歿爲辭遂爲之銘曰
市翁之門餘教未沫維濟尹公克超流輩遠追詰軌

與之作配瑤華之事血泣悲慨一卧千古我自愉快
張茲美實用質久載

世子翊衛司副率金公墓碣銘

并序

故相國安東金文忠公遇虜難殉節於江都後學師
尊之稱為仙源先生子孫法象其賢咸以忠孝節行
自厲有諱盛益字道卿號水月軒者文忠之玄孫文
忠諱尚容傳吏曹叅判諱光炫沔川郡守諱壽賓寔
娶全義李氏清江公濟臣曾孫女也公雖晚出於郡
守而天資特穎若不羣學語便識文字十二喪父持
制如成人見者歎異之公自幼已負器度弱冠與儕

友賞月遇颶舟幾覆獨傲睨不顧曰吾輩豈滄旻人
哉時有島夷虛警中外奔波公灼知其必不然默運
心筭坐定繹騷長老以為非年少所及亡何兇孽鑽
進彝倫滅絕宗老文谷公首及於禍公悲憤慷慨既
連叅守 闕之班又有入海避世之志遂奉大夫人
還洪州之葛山村杜門屏居謝絕人事常仰屋長歎
曰吾處無 母之國復何用衿紳為哉見一時名家
赴試恐後獨以大義裁之毅然不撓及至 天日復
明 坤位光復乃始應舉其所處義亦可謂視古人
無所愧矣噫公出處之正此焉可觀而於見小人必

嚴之戒又有加人數等者有人飾貌嫺辭務爲態色迫欲借公鄰好強以名其客而公斥不應曰士子托身其可苟乎盖有微意而不以告人也後其人得罪名義爲世所棄始歎公先見之明庚寅除長寧殿叅奉以親教屈意強赴已自免去又拜侍直副率時景廟在東宮朝議極遴僚屬盡用時望非例授也一時榮之是後兩赴文圍或微省見拔或試卷忽被遺失人知造物者之巧作簸弄歎公時命之乖違而遽聞大夫人病作歸及二日竟不幸公孝誠素篤至柴毀骨立臨終自知夜晝之理殊無怛化色惟複語

誦陶彭澤聊乘化而歸盡一語悠然而逝乙未六月七日也享年五十一始葬先塋側後十二年用卜人言與配安東權氏永窆于大興郡光時村負申之原權氏執義讓之女習齋學之後淑德懿行具著故叅贊愔墓文言出同氣可謂信而有徵矣育六男三女男長時發郡守次時哲佐郎次時述次時吉次時逸次時訥女適縣監李顯之縣令李綬縣監申埜時發無子子弟之子教行時哲有二子教行友行時吉有二子騫行淵行時逸有二子若行默行時訥有一子憲行公爲人氣宇軒昂個儻不羣心事坦平寬簡無

陶谷集
訾務存大體不拘小節其事親也婉順無違奉先也
敬謹不怠友愛昆弟敦睦族戚輕財重義振施不倦
濟窮恤貧如恐不及堂從孤子無所依歸館寘訓誨
待之如子矜念眷係至纘屬猶不已早孤失業能奮
然自立玩繹經傳傍及詩律頗喜流峙之賞域內名
山水遊跡殆遍少與友生約昏後有廢疾堅守亡改
又嘗與友約行值大雨強行遇諸塗其尚氣槩已然
諾皆此類也晚歲子姓衆多門戶成立人或規之曰
盍亦稍事積貯使子孫定產業也公笑曰此則吾不
爲已且吾誦疏傳語矣嗟乎今日季世也齷齪鬼瑣

頌

士風墜地如公者何處得來余重爲之感慨而書其

墓曰

維公之美忠孝節行公以世徵萬載攸盛我庸詩之
維德之靖維石弗磨尚垂于永

花浦先生忠正洪公墓碣陰記

後丙寅加贈公吏曹判書謚忠正臨患不忘國曰忠
以正服之曰正立祠南漢錫號顯節平澤祠亦錫號
褒義又因儒疏超贈領議政兩配從贈貞敬夫人公
暨許夫人粹元夫婦俱施棹楔之典忠孝烈三扁輝
映門閭過者式焉丁酉 上幸溫泉特遣官致祭墓

所又御製哀三學士詩曰嗟哉三學士凜凜節如何
知是 皇朝在力排醜虜和拜辭忠愈歎臨歿志尤
磨舊宇圖新煥追思感實多 聖考崇節獎忠之意
嗚呼至矣應元公兄教官翼亨之子娶士人沈光濂
女禹錫司饗僉正許玠知事鄭相吉生員其季女幼
者適李維新以衡叅奉其四弟名以聘以重以徵以
晉沈益善豐德府使廷者廷老廷耆俱郡守禹錫男
澍三女適金泰升李翼徽教官趙明履澍無子子族
姪侃卽教官公玄孫也內外曾玄摠三百餘人

藝文館檢閱吳公墓碣陰記

畸翁鄭公爲此文後以銘辭不滿意改構以送此銘
是也畸翁遺集以初製銘見錄恐致後人疑茲記於
後畸翁以公知己友悼其早闕遠圖闡揚發揮殆無
餘蘊文辭亦煒燁信可以垂之千古而不朽矣獨公
值讐 母之世杜門不出者十年至癸亥正倫始赴
舉得第此實係公立身大節尤不當刊落而此文略
不概見豈以玄隧之文貴於簡要而亦曾提出稱道
於誄詞足以互見故不欲備舉而然耶夫人都事復
興女莊正寡言笑通書史識道理教諸子終有成立
人謂媿古女士而亡媿後公三十年癸巳卒享年七

陶谷集
十移公葬合窆於同福縣水谷里面乙之阡唯樹碣
未暇焉歲辛亥公曾孫前都事大濬慨然與羣從子
弟謀鳩財伐石刻以豎之使公遺蹟表揭道左其奉
先之誠又可書也

陶谷集卷之十五

陶谷集卷之十六目錄

墓誌銘

同中樞趙公墓誌銘

監察梁公墓誌銘

副護軍朴公墓誌銘

淑人洪氏墓誌銘

贈貞敬夫人沈氏墓誌銘

孺人吳氏墓誌銘

孺人崔氏墓誌銘

珍山郡守尹公墓誌銘

典翰金公墓誌銘

承議郎朴公墓誌銘

贈吏曹判書俞公墓誌銘

淑人趙氏墓誌銘

淑夫人沈氏墓誌銘

全羅觀察使李公墓誌銘

榮川郡守朴公墓誌銘

統制使李公墓誌銘

貞夫人洪氏墓誌銘

廣興主簿徐公墓誌銘

部將徐君墓誌銘

通德郎洪君墓誌銘

陶谷集卷之十六

墓誌銘

同知中樞府事趙公墓誌銘

并序

余嘗觀故家世族其立基深厚垂祉綿永間雖有官位之未甚隆赫者而亦皆樹惇而全龐類非叔世皎厲纖巧樣子也故凡所以啓慶燾後者率由是而臻焉故同樞豐壤趙公亦其一也蓋自其鼻祖孟翊麗祖統合三韓策勳官侍中本朝益貞又策翊戴勳官吏曹叅判至諱宗敬諱廷機諱守翼連世爲弘文館學士俱以剛直名守翼之子諱滄又翊 仁祖正大

陸谷集
倫策勲亞京兆尹封豐安君其鍾美世令積累顯盛
有如此者可謂源遠而流長矣豐安之子諱仲耘刑
曹正郎配淳昌趙光弼女生公諱道輔字汝一少學
於李公敏叙文足以闡甲乙危得而失之從蔭仕由
顯陵叅奉陞司饗奉事 宗廟直長轉禮賓主簿
義禁都事出爲玄風洪川二縣監及歸年已七十以
子尚綱列侍從準國典陞通政拜敦寧都正 肅廟
入者社推恩陞嘉善拜同知中樞府事 景宗甲辰
七月十八日卒壽七十六公性寬裕真樸有長者風
待人誠意藹然嘗遇持衰人號呼道傍問知擔櫬人

逃逸卽畱住諭集得以成行其人感泣涖邑不喜刻
核不要浮譽有人與至親爭田公爲申教戒言甚懇
篤卒致慙羞罷去斷歿反覆審察必求其生道有
失入者力辨而出之民皆服其仁明公平生慎默未
嘗臧否人物顧於內甚辨在南縣一道人士將請從
祀先賢於文廟有醜正者攔阻其行公摘治首倡人
右其人者爲方伯怒而黜之嘗使人讀已巳倫紀疏
輒嗚咽流涕辛壬之間兇賊猖獗 宗社幾覆尚綱
協同志抗疏火色危逼公夷然曰死命也何恨及尚
綱遠謫關塞亦無戚戚意墓在揚州廣巖先兆次亥

坐已向之原夫人慶州金氏祔金氏有婦德考府使必振判書貞孝公南重之子有三男一女男長尚綱吏曹叅議次尚綱別檢尚紀生員女適尹天健庶男尚綏尚繼女適武科李榮先李錫三尚綱三男暉暉一男備餘并幼後承甚繁公之餘慶尚且未艾信乎天道之可徵也銘曰

世方驚外公守其真俗漸趨漓公葆其淳斤斤自飭以承先武惟其不羸于嗣顯裕

司憲府監察梁公墓誌銘

并序

湖南之昌平縣有所謂瀟洒園者泉石花竹之勝宜於碩人之邁軸梁公諱山甫隱居行義於其中仍以瀟洒爲號鄉人咸服其高致有子曰鼓巖公諱子澂亦棄縣監終老於斯鼓巖之子諱千運字士亨始登國子上庠歷官童蒙教官司憲府監察司瞻寺主簿意不樂棄歸守故林以沒俱無愧於皇甫之傳蓋瀟洒公少挾策於靜菴先生最與河西金公麟厚爲道義交鼓巖公又爲河西之子壻仍師事之監察公與其兄千頃千會出入平溪先生之門少見賞於重峰趙文烈公清陰金文正公亦與交厚用能成就其行

業氣節祖子孫三世蔚然爲南土之望盖有師友浸灌之功不獨以資稟之美也魯無君子斯焉取斯不其然乎監察公沒已九十年而墓無識今其曾孫采之千里來扣謁余文不已余非嫻於辭者其何能闡發潛德以垂來世顧余高王考雙谷公與公有同榜好義不可終辭遂取其狀而略叙之公性篤於孝友鼓巖公病革嘗糞禱天一如古人前後喪俱廬墓終三年諱日在隆冬至老不廢澡浴雖於避寇蒼黃中亦備儀設奠哀動傍人推以及於庶叔亦盡其誠意二兄抗危言及刑辟公旣深傷之姊妹或歿於烈或

其夫殉國難罹家禍痛盡尤至撫孤恤嫠多人所難及自先無析箸公仍戒子姪曰吾家以孝相傳本無文券爾等各自祇飭無忝所生以小學三綱行實等書訓誨子女家法甚正至後子孫多以行誼見稱瀟灑公嘗作孝賦詞旨婉篤河西步其韻而稱道之公之諸行皆本於此云壬辰之亂鼓巖公方老病將奔問官守公泣止之鼓巖公遂命公從高苔軒敬命軍高公閱其無兄弟強使歸養公不得不勉從而心常歉然也始與賊臣爾瞻有舊及其主兇論卽絕之所善多名勝士宦游數年一不跡權貴門其介潔又如

此公嘗自號瀛洲亦可見志尚出埃壒之表矣梁氏
出耽羅爲羅麗著姓入我朝累世不振至諱泗源
中廟朝薦賢良官主簿號蒼巖卽瀟灑公考也公生
於 隆慶戊辰卒於 崇禎丁丑享年七十葬于本
縣之中山先兆下初配安東金氏生一男夢禹後配
昌原丁氏生三男三女男夢羲夢炎夢堯女皆嫁士
人側出男夢鯉內外孫曾甚繁不盡錄系之以銘銘
曰
允矣梁公克著世德本乎家庭資於麗澤如彼漢水
紀于南國以涵以蓄永流無極

副護軍朴公墓誌銘 并序

天啓甲子逆豎适以關西節度使舉兵反諸鎮望風
瓦解豐川府使朴公榮臣獨嬰鋒力戰兵敗被執奮
罵不屈而歿事定朝廷爲旌其閭曰忠臣之門累贈
至兵曹判書謚忠壯官其子四人始公之抗賊也賊
將李守白斬公頭防禦使李重老等六人亦歿之守
白素與重老郤殘其屍以獻适及适勢感守白又斬
以降得貸其歿竄之絕島後遇赦放還公長子護軍
公之屏性至孝沫血飲泣誓不共讐賊戴一天陰與
弟之垣之藩重老子文雄文偉圖計欲斲殺守白以

陞名集
快冤憤護軍公勇力絕倫能超八牛舉壘石如砂礫
守白畏忌甚匿驪州峽籬以荆棘不出門者數年公
乃佯歿使家人發喪守自信之上京求補官公與之
垣踵而行欲乘便施手適有三雉飛過李文雄謂公
曰盍射此雉以占成敗公曰幾雉曰第二可公發矢
正中第二李喜曰賊必矣至東門解劔贈門卒曰
此劔傳於李文雄當厚報若卒諾許文雄兄弟遂持
劔來會之藩亦至趕賊至兵使李沆第沆爲賊置酒
作樂至晚賊出公命之垣先射其馬公繼以大杖擊
賊頭賊顧曰聞汝歿乃生乎公曰未食汝肉吾何徑

歿又以杖擊之賊抽刀刺之垣急超而避之并
前殺賊剖其腹嚼其肝一市坌集皆感激爲之泣下
公於是提守白頭待罪敦化門外乃甲戌七月十三
日也 仁廟甚誼之然慮後弊欲施償命律臺閣爭
論不可金吾請詢大臣大臣尹昉吳允謙金瑬等引
韓文公復讐議張瑄成景雋故事以爲情有可原吳
公議語尤切有曰朴榮臣李重老忠臣也李守白逆
豎也忠臣之子爲父復讐殺一逆豎而置法抵罪則
烏在其扶倫紀崇節義也 上從其議只配義城明
年宥公爲人伉直不拘小節見非違雖權貴人面斥

不饒器局偉然平居務寬裕而遇大事輒勇決果敢
卒能奮不顧身擅殺之罪于傳讐賊請命禁門孝
義節烈已足以驚動一世而若乃父歿於忠子著其
孝并垂聲於不沫如公橋梓者求之前昔絕未有聞
嗚呼豈矣公字汝障密陽人曾祖諱虎副司果亦以
勇聞祖諱宗男以武舉擢拜承旨有名於 宣祖朝
外祖廣南君忠壯公李光岳戡倭策勲公之世閥如
此公始除 靖陵叅奉陞濟用奉事亡何棄歸鄉莊
不復仕以大耄陞秩爲折衝將軍龍驤衛副護軍名
號雖壯乃散階虛銜也生於 萬曆辛丑年八十四

以甲子十二月四日卒葬于楊州金村先塋娶忠州
崔光潔女生四男一女男燧府使熺主簿燁縣監煥
主簿女適邊聖遇諸孫尚綱尚淳尚周長出而下二
爲庶尚一尚質仲出尚夔尚老郡守尚玄叔出尚謙
季出府使震英震和震暉震吉邊出銘曰

凡人開口輒說忠孝其言則易而鮮允蹈嗟是父與
是子各盡分而無愧惟護軍窮老而自翳今終莫掩
其懿美金谷之原水麗山奇公於是藏其永勿隳

淑人南陽洪氏墓誌銘

并序

原城元侯命益哭其妻淑人洪氏手爲狀請余誌其

墮辭凡千有餘言余曰噫可銘也婦人之行其大者
有七日孝曰友曰莊曰敬曰正曰勤曰儉而今淑人
盡備有焉則雖古中壘所記何以加茲蓋言其孝則
事父母殫其誠推及祖母世俗婦女於私親喪多不
以禮獨持制甚固事季母如母季母亦子視之氣味
相合許爲知己事舅姑若祖姑生也承意順志洞洞
屬屬歿也殯歛祭奠極其誠潔言其友則視同氣如
一身視夫之昆弟如己之同氣同居數十年終無間
言娣姒妯娌之間恩義克篤人人各得其歡心言其
莊而敬而正則天資端貞事夫禮甚肅無燕昵之私

規益頗多持身恭恪恒曰若少失謹飭則必忝辱於
所生此罪也見不善必峻斥不饒賢邪是非之別剖
誓甚嚴不惑巫祝左道居然有女士風言其勤而儉
則善於理家拮据有無苦身自約早夜不懈不喜芬
華被服斥綺紈從夫之縣益勵廉潔之操闔外截然
無交關嗚呼世道不古風氣日頽號爲男子而無義
無行者皆是也閨門懿美之若此尤豈可易得哉仍
念上所云淑人季母卽余之姊也余固耳熟於姊言
則蓋不待狀而已知淑人之德矣敢不樂爲之銘淑
人系出南陽高祖諱聖民判中樞文貞公曾祖諱瑞

翼分兵曹叅議祖諱命夏領議政文簡公考諱遠普
臨陂縣令妣慶州李氏叅判時術女以 顯宗甲寅
生年四十九而卒於其二月二十六日乳一男二女
不育以同年四月初六日葬原州長山里元氏之塋
元氏族出具在其表誌此不著銘曰
何德之貞今何壽之不羸何後事之伶俜太史作銘
今昭厥度配碩媛兮永終古

贈貞敬夫人青松沈氏墓誌銘

并序

故相國牛坡趙忠翼公諱泰采有賢配曰贈貞敬夫
人青松沈氏領議政諱之源之孫也考府使諱益善

妣南陽洪氏忠正公諱翼漢之女議政相 孝廟有
名忠正爲 皇明歿義其世德如此夫人自幼識度
已過人嘗與羣兒作爨戲火延薪將及於屋羣兒皆
走匿獨不去急呼人以救長者大奇之有婢潛摘隣
果與喫却不食府使公嘗在官見有獻珥環求差任
者以試意卽對曰此賂也不可受府使喜曰是宜有
是言矣忠翼公之按部嶺南也有守宰餽于家輒却
之忠翼公莅縣窮族來有干請嚴辭斥之及聞其病
甚加顧視得以回生其人感泣性儉素不喜華靡每
族家會集以綉綿淡粧處於錦繡珠翠之間不以爲

耻人莫不歎服理家纖鉅井井無少罅漏事姑以孝待妯娌以和佐君子規益甚多御婢使有恩而威亦不廢閨內肅然無異言以 肅宗已卯正月十六日疾卒年僅四十葬于長湍東坡驛村後二十四年忠翼公卒遂同塋育子男女六人男昂彬郡守觀彬叅判謙彬教官女適李廷煥進士朴舒漢生員洪啓百昂彬無子有繼子榮克女四人適李煊宋堯恊尹得敏一幼觀彬亦無子子同宗子榮哲謙彬二男二女男長卽榮克餘并幼趙氏望楊州忠翼公三世曰知事昭敏公諱存性判書忠靖公諱啓遠郡守贈領議

政諱禧錫夫人之卒忠翼公官爲承旨後累官至議政府右議政夫人亦累贈至貞敬嗚呼夫人以莊淑之行得利女之貞閨門盛美庶幾匹儔於南澗之詠而不幸中道而天不克永享菲祿此固公所深悼而黨親之所甚惜也雖然婦人顯融莫尚於媿得名賢公當 宗社顛危之日挺然立大臣節畢身殉國精忠赫著而夫人乃爲其嘉耦則其榮光盖將遠流於無極矣夫豈魚軒象服長筵稚齒只爲一時榮之比哉夫人其可無遺憾於地中也夫銘曰
猗嗟夫人德則多有惟卒未究烈士之出忠臣之婦

其榮也久玄宅孔安公藏左右并垂不朽

孺人海州吳氏墓誌銘

并序

孺人吳氏系出海州曾大父迴不仕大父聖蒙文科刑曹正郎父嶢通德郎娶尚州黃氏生孺人性貞靜有婦行年十八嫁申氏頗爲夫黨所稱美顧命道窮甚甫六歲而失母無所依薄鞠于伯母後四年通德公再醮孺人不免泣柰之悲旣歸而夫家酷貧殆不能煬竈竟罹奇疾手足俱廢以 肅宗乙亥二月二日卒年止二十九嫁纔十二年矣有女年九歲男五歲未女在繡其男夙慧異常能讀史而善疑長者莫

及後其母一年又天歿孺人之窮至身後猶然可哀也已孺人墓在楊州申氏之塋二女後歸學生閔鎮夏進士李重郁申氏系出平山夫名球前任 禧陵奉事銘曰

白羊之谷玄厥扁埋茲貞石惟永寧

孺人水原崔氏墓誌銘

并序

平山申球謁余曰球也命蹇早喪配無嗣復娶水原崔亨坤女爲配性溫而心靜貌端而言寡曾祖崦祖天極俱以孝聞克襲前美事父母有深愛旣喪哀慕益篤或不與祭輒齋沐遙拜以伸其誠奉尊章甚謹

吾母老而病養口體護起居不懈夙夜邀姨之與吾
母齊年者同居以順適母意前配亡日爲之喪食曰
是曾事我君子有兄弟義何忍肉球寒窶甚并曰蕭
然安之不憂曰此士之常也然經理得宜微碎不遺
以此稍自延保庶幾乎古所稱良轉運者矣不幸中
途而歿歿時處後事纖悉教戒家人皆中理致又可
驗其平日識度矣歿以 景宗辛丑正月六日而貧
不能辦葬至五月一日始窆于楊州白羊谷生男女
五人俱夭以球兄子徵夏爲後球重哀其生旣迫吾
貧歿無以章其懿美願得一言之重以慰其魂余亦

再抱斯戚真所謂傷於虎聞談虎而色動者其何能
已於言耶遂爲之銘曰

維年之促四旬有九而傳之永千禩其壽

珍山郡守尹公墓誌銘 并序

國家自丙丁以後冠履之倒置極矣尤菴宋先生首
倡春秋大義以啓牖一世士趨爲之不變於是一笑
齋尹公以節義家子孫起而羽翼之人之望公如東
京之顧俊知與不知咸誦體元體元者公之字也旣
而消長往復之不一而先生終及於禍公亦流竄瘴
鄉及世道清明亟蒙環召士友日遲其至而行至半

道遽卒嗚呼君子之不幸乃至是耶公南原人諱以健曾祖暹弘文校理壬辰倭難殉節謚文烈祖衡甲縣監光海時登第仕不顯而有三子長榮弘文應教丙子虜變守南陽歿之謚忠簡仲集弘文校理以斥和歿虜庭謚忠貞 孝廟嘗歎曰尹氏三節可貴其季柔爲 皇明守志晦跡自號龔啞以卓行特贈掌令公其長子也生於 崇禎庚辰將琬有大虎伏戶外生而英特異常五歲而孤能自奮爲學文采蔚然七歲謁清陰金先生先生奇愛之字龔啞公曰剛伯有子矣仍遍謁諸名公遂師事尤菴尤菴一見獎許

待以國士公自是益砥礪名行務去偷懦習言論痛快其於世之卑熾熟軟者視之蔑如也十六掌學官議時有目清陰爲奸者士論駭憤罰其人其黨欲解之須公一言公大言折之曰胡虜犬豕也猶敬服先生節是人曾犬豕不若也其議遂沮 孝廟有大志密搜訪歿義家人公制行特出倫比 上內善之會上薨不及任用 顯宗朝有閩人漂到濟州不改漢儀朝廷畏虜將執而與之公抗疏言其不可義辨激烈人比之校理公斥和疏癸丑升上舍卽除 東宮洗馬甚選也仍陞侍直 肅廟卽位以舊宮僚例

陞六品時有尹鑄者盜虛名至膺旌招與公同宗嘗有所邀請公母坡平尹氏有賢德語公曰而父曾與此人善後覺其不正而絕之其勿往公遂不應鑄銜未發至是得勢驟貴爲憲長構士禍以尤菴爲禍首以公游尤菴門欲囚府而考訊之吏言朝士囚府無例乃止庚申鑄敗死其黨迸退尤菴還朝宰臣儒臣交口薦公拜司僕主簿出爲金城縣令遞拜引儀工曹佐郎陞爲珍山郡守公蒞外政尚嚴明奸猾讐伏金城時有何人橫屍道傍賊不得公輒解繫屍繩蔽去察視多人中形色異者陰識之至近村民舍見壁

有繩取前解繩合之弗差問其主名卽向所察識者按之具服一境大驚稱爲神明按使上其考曰才大邑小焉用牛刀珍爲邑處山峽間土瘠薄民皆窳公善於裁處公私無乏嘯詠自適若未始有事而條理井井自不可及後之爲治者莫能絕也公雅見重於世小試亦著名蹟時望益隆咸謂庶官未職非所以待公方將虛臺省位處之而是時年少輩自成一黨貳於尤菴公自此跡與時左遂不果已巳鑄黨復用事首竄公金海公志氣彌厲終無隕獲意甲戌改紀宥還到清州城外以五月二十日卒享年五十五以

陶谷集
六月十日歸葬于金浦東林村之先兆公有弟以性
字復元少公四歲行誼志節亦與公伯仲前公七年
卒職不離叅外世俱惜之公至性純行克承前美事
母盡孝疾劇斲指及喪哀毀踰禮柴綴骨立尤菴歎
曰體元兄弟今世之二連也自痛早失所怙終身不
襲華采以南北俱有世讐不近二境物謹於祀享亨
芼濯漑不任婢媵當祭哀號隕絕一如始喪友悌甚
篤昆季連門日與湛翁爲世所艷稱以至惠宗邨御
家衆各盡其道平居廉約自持罷外邑行橐蕭然爲
人嗜義立然諾急人之難不計已私有古烈俠風所

交游盡一時賢豪長者洞閱城府不設崖岸而標高
揭已不肯以言色徇人每奮髯抗談雜以諧謔辭氣
激昂意致峭爽雖厭厭如蝮志者對之不覺生氣之
發動也公以家世忠義二父立懂虜難常感憤悲吒
旣遇有爲之主庶幾憑仗威靈以伸復雪之志而
天不顧佑竟亦締繡則益伊鬱不自克在南郡輒戎
衣長劔夜起彷徨或月夜微醺每歌青石嶺曲爲之
慷慨泣下青石嶺曲者 孝廟赴瀋時作也其托意
之深豈俗人所與知哉最嚴於陰陽淑慝之辨如以
快刀割斷以是善類無不親就而不善者皆嫉惡之

石谷宋尚敏訟尤菴被淫刑歿知舊懼不敢問公方持服而躬往撫屍棺歛而去人莫不義之有爲王和相求解於尤菴者公悲咽失聲力辨其不然尤菴爲之動容乃歎曰於此可見此友氣性矣尤菴嘗詠公家梅竹曰君家祖與孫節義將無同蓋深許之也嗚呼公以卓犖奇偉之姿早得尤翁爲之依歸士論倚以爲重公亦奮勵思有以自見而世路多歧邪說交鶩尊攘之義漸見黜昧公遂留落不前卒之編名僞籍不得返道州之行使其平生抱負之重沉屈而莫展嗟乎惜哉配昌寧成氏贈叅判楚逸女有婦道後

公二十二年卒而祔焉無子只有三女適觀察使李海朝洗馬宋一源士人李容而都事李徵臣崇臣縣令宋文相正相後相李維慶其子與繼子也公沒後取忠貞公孫浚爲公後浚生一男三女男厦柱女適魚有夔餘幼厦柱生一男亦幼宜顯年九歲挾筴從公公期許甚至不視以童孺凡係起居接應以至師友論說皆使與聞仍執手而喟曰吾歿後將以累汝矣俛仰之間倏已五十星紀而宜顯亦老白首矣今以不腆之辭記公幽隧把筆臨楮恍然若復近光儀竊不勝歐太常之追感也銘曰

古龍維籍三節昂峙聳公軼倫有明進士是生偉人
允迪卓軌金昆玉友儷爲世紀敬業樂羣于彼巴水
值時罔極協持正義悲歌激越誓雪深耻低徊晚暮
或擠而止嶺海追命中途遽委沉沉脩夜鬱鬱奇意
東林之麓寔閱衣履尚有英爽映徹泉隧

弘文館典翰金公墓誌銘

并序

粵昔嘉靖乙巳丁未之際奸兇竊柄設刀鋸以待
善類然士氣猶未挫清議之發如石壓笋出以此益
觸虡怒至丁巳遂起大獄將先殺一二人其一卽故
典翰金公虬也公受榜掠無撓辭兇徒亦無以成案

滅歿竄慶源慶北之極裔地隣胡最遠惡盖以深嫉
故必處公於此居八年明廟察其寃特命放還拜
掌樂正士林方擬爲碩果得輿之象乃以其明年乙
丑七月十六日疾卒于禮山村舍嗚呼斯誠世道之
不幸豈獨於公有幽明之憾已也公光山人字夢瑞
爲人姿稟邁往操履潔修雅負氣節疾惡如讐而風
流文采又傾動一世推爲清流領袖云年二十二中
上舍越三年擢文科始隸承文院歷兵吏曹郎正言
持平掌令選入弘文館由修撰校理至典翰間爲司
成軍器正出爲嶺南暗行御史監軍御史聖節使書

狀官東萊宣慰使公登朝正當士禍之餘 明廟舅
尹元衡與李芑等表裏糾結勢焰薰天士皆劫劫改
操公介然自持不少骫骳爲正言偕兩司劾芑罪爭
之半月得請乃已爲掌令啓削李樾湖堂之選樾元
衡黨也爲玉堂引古證今一意格非爲吏郎專務激
揚衡鑑不差時金公繼輝金公弘度與公名行相埒
一時稱爲三金協心同志力擔清議士論倚以爲重
而 上亦頗眷嚮其以御史出嶺南實以公有風力
特遣也羣小忌媚日深而顧無可疵摘元衡欲牢籠
公曲示善意公終不假色辭時元衡主通庶孽仕路

蓋爲其妾蘭貞所出地也公知其意與金公弘度力
斥之事遂已亡何元衡以蘭貞爲妻藉 大妃旨至
封夫人公與弘度將極論其擅權縱恣狀尹春年知
之泄於金汝孚汝孚者慕齋之子而素兇險無行密
附元衡不容於公議公在銓汝孚圖拜中書以母病
爲言及得是職輒宿娼家公痛斥其惡汝孚大銜與
其徒崔堦李銘金鎮讒之元衡元衡遂除汝孚司諫
又囑憲長吳謙以危險躁進詆訕公卿動搖 君上
等語捏成罪名李樾陳復昌權纘等同聲應和至請
拿鞫公對簿隨事洞辨辭理明直兇徒必欲強服而

陸名集
不得公之素守可見也聽松成文貞公聞公下理寄書其子牛溪文簡公亟示慨惋之意使往候起居其素見重於斯文長老亦可見也在謫作歌二章以寓戀君意人以比子瞻之水調公文章瞻雅自中規度持身清儉所居不蔽風雨然皆公餘賸也惟其當羣奸蔑貞之後獨秉正誼以風厲頹俗屹然若中流之砥柱雖摧敗闕嗇曾莫究用而直節風稜彌久彌顯至今聞者猶覺有生氣其視致位崇班終泯滅無稱者孰得孰失必有能辨之者矣所可恨者 宣廟初元權兇屏迹士類盈朝如金公繼輝與朴思菴奇高

峰諸賢俱以乙巳後流落之人出入啓沃謀謨可觀而公獨阨於短局不得頡頏翱翔以大展抱負豈運命不齊天亦無所主宰也耶公卒時年四十四葬于交河藥山之先塋配全州李氏祔左曾祖順誠平壤庶尹贈吏曹叅判祖礪禮曹正郎考世愚典籍妣靈山辛氏進士悌聃女配興城副守億年女男峻男好男監役吉男天歿曰別提瀚縣監湮峻男子而湮後好男瀚生正言振遠護軍重遠湮生興遠而振遠子暕重遠子縣令晞宣教郎晞而晞後興遠錫圭夏圭白圭暕之子都事命圭晞之子元圭晞之繼子而錫

隴名集
圭生壽欽壽鉉命圭生壽錫壽鏤長持平季察訪元
圭繼子孝根后泰運泰壽欽子啓泰聖泰光泰壽錫
子噫亦盛矣公之遺羸尚有徵於斯歟壽鏤來請幽
堂之銘余謝曰余言曷足以重公唯栗谷李先生深
傷公寃至著之日錄尤菴宋先生追愍公罹禍對公
宗人爲之流涕以此銘公庶幾爲闡揚懿美之道歟
壽鏤曰然此足矣遂爲之銘曰

嗟惟公厲志節養氣剛守操潔秉清議確難奪擊孔
壬奮直舌波流奔砥柱屹一不中患遂掇身雖阨道
非詘歲之遠芳靡歇潭翁記垂衮鉞巴老言闡德烈

公奚憾賢有述揭以茲不愧筆維昧詒識玄室

承議郎朴公墓誌銘

并序

密陽朴聖源袖狀謁余曰承議郎諱承任字子重者
聖源曾祖考也吾朴爲東國大姓副提學剛生至叅
判光榮五世用文譜顯至吏曹判書忠元又大顯生
員好賢牧使安禮其下二世而牧使娶縣令沈友聖
女生公資明而質厚篤於孝生養歿葬式禮不懈爲
學博涉諸家曉達兵機策勝敗輒中丙丁亂後不赴
公車憶念周京儒賢膺召在朝才公要與同事不應
常歎曰後幾年士林赤矣至甲寅果驗逆賊噐遠反

形具人多未覩獨預燭幾微勸知舊遠避嚴於辭受
視不義餽若浼嘗有竇諫議延慶事其人涕泣拜謝
推與其半峻却不許雖歛迹自晦倚人魁士樂與從
游朝紳亦頗知其賢趙公龜錫亟稱爲君子公居楊
州先墓下積三十餘年而卒距其生 萬曆戊申壽
六十三葬楊根水多谷以配龍仁李氏祔李氏承旨
弘望女有婦道年八十四卒男玄胄五女皆嫁士族
孫震錫乃錫曾孫最源聖源泰源聖源文科正字泰
源後叔父其大胄興胄公庶子也吾祖潛德懿行可
傳於後而家乘散軼聖源又後出昧陋十不能記一

二惟執事哀憐加惠俾泯沒者顯遂幸甚余曰曾公
事行若此余固聞知其德信可謂潛矣雖然闡揚遺
美永垂不朽豈如我者所可爲也聖源固請遂銘其
墓曰

散階下壽胡慳厥受惟其有蘊以裕于後

清州牧使贈吏曹判書俞公墓誌銘 并序

江都畱守俞侯拓基氏爲其先判書公具狀一通請
誌墓於龍仁李宜顯辭甚勤噫微狀余固知公服公
深矣其敢辭諸誌曰公諱命岳字君四慶州府杞溪
縣人也杞溪之俞歷羅涉麗簪組蟬嫣迄爲大姓入

我朝禮曹判書景安公汝霖戶曹判書肅敏公絳仍
父子爲 中明朝名臣公肅敏四世孫大司憲諱檄
之子祖江原觀察使贈左贊成諱省曾曾祖贈吏曹
叅判諱大儀母清州韓氏奉事旬女五歲而孤七歲
韓夫人又不幸伶仃叢子幾無以爲存能感激自奮
聞三淵金公高雅有逸軌往事之與金昌立卓而洪
有人仁甫切劘爲文詞上下千古踔厲風發謂塵世
迫阨不足以開拓心胸携一友步入嶺東之楓岳窮
高極深踰月而歸其氣浩浩如也所著篇什大爲農
巖三淵二公賞公爲人豐貌脩軀局度軼羣厭作迂

儒拘泥態期爲有用之學尤敦尚名節己巳尤菴宋
文正公爲禍首偕同志上章辨理已送李忠貞尚真
過嶺李公公夫人外翁也素器公是時諫廢 后竄
公自此不赴舉抗志物表居六年 中壺位復尤菴
雪寃復就公車升乙酉司馬丁亥除義禁都事長官
才之輒屬以難事陞長興主簿轉太僕見才如義禁
及拜戶曹佐郎陞正郎尤恢然疏瀹猾胥斂手所筦
出入米穀前多近賦誦公一洗之有羸盡班施部史
猶不樂久居力辭必免出開寧縣監百瘼俱祛歡謳
載塗時余按其道實目擊也移陞大丘府判官府最

繁雄公爲之若未始有事舊用民歲修冰室勞費不貲公自營辦伐石不日而築民固不知也咸德而神之至它數事爲弊甚者悉歸更革葺屋大蘇治行爲一道最有準職命晉順興府使不威而理亡何擢拜清州牧使州政承屢遞餘紛如亂髮公到卽櫛爬之無遺未月而復公少從事師友雅負名論及仕中外隨節磔解無厚入有間不啻也朝廷皆知爲需世才滋欲重用而乃以戊戌四月一日卒于官距其生丁未春秋五十有二用畱守推恩再贈至吏曹判書始厝于楊州車踰嶺先兆以地之不宜後十三年改窆

鐵原芝蕙洞向卯之原夫人余族祖正言公諱斗岳女封貞夫人方受畱守養有男女各一人男卽畱守以才望顯娶贈執義申思遠女生四男五女男彥欽彥鉉女適洪益彬洪欽輔餘并幼女適士人尹得謙生一女適洪維漢公內行甚修自傷幼失怙恃喪餘哀動傍人與仲羅牧公相長大至老敬愛彌摯拊孤姪事伯母以至媼睦宗表瞻濟窮寒多人所難及者信義孚於交友識慮周於事會三淵詩之曰然諾無爽言緩急足仗智人以爲知言公見以長厚多可自表而中實伉勁少得同榻人不正事卽決去若浼而

不以洩平生無所干託亦不受人私其爲邑秉公守
法用是道焉三邑俱樹石以頌而大丘則遍樹坊曲
清莅財旬月而攀輻哭送者幾且百人居家不事積
箸頗以挫產弗卹也歷腹省鉅郡亡所增益雅不欲
以矯刻取名有歎其廉者卽曰吾非不爲特未及耳
始公以孤童克自樹立意氣偉然幾乎籠蓋一世而
時命不諧終棲棲符檄間雖功課卓殊要皆其糝糠
耳少日蘊抱曾莫之究斯誠士友所共嗟惜者也然
遺餘不盡之蓄以篤嗣胤其進方未可量噫天固以
是而乘除之哉旣誌而又以銘銘曰

拓

志隘寰區心游邃初鬱壯圖蚤繩鴻彥中恢勝踐契
奧鍵違豐安匱踴袞崇誼壹莊軌屈跡雷封羣州率
從巷駟同材稱廟廊績止循良奈彼蒼有承典刑國
之貳卿天報羸有玄斯石有琢其德詔悠歷

淑人漢陽趙氏墓誌銘

并序

南陽洪君啓欽爲其祖妣趙淑人求誌其幽堂之石
謹摭其狀而銘之曰

淑人之氏始出漢陽有諱光祖倡道東方延延累葉
休有軌則舜男司果義賢監役三世松年郡守其職
郡守媿權女士是毓洪門高華諱受澆賢乃東良匹

克佐豆邊澗蘋潦藻家以允釐用柔而剛莊色端姿
心辨識曙觸節通透王舅亢亢重罹陽九峽山之投
甌石屢空刺繡養蠶助厥馨供簪珥羣聚易險殊性
一濟和遜終無乖競教兒以義事夫子謹門絕竿牘
家有訓範化行閨闈施及媼申恩拊既翁衆口齊贊
甲子孟秋日之廿七爰終壽筭恰滿六袞窆于積城
面卯其原有子禹瑞職長諫垣女安相一趙正夏壻
孫啓欽鉉又三姪妹允中明勛安趙之子內外曾玄
殆不勝紀余觀世衰婦儀多虧蓋繇無源罔攸師資
嗟惟淑人斯宜取斯載穆令聞以收繁祉凡今之人

其孰與比刻銘寘墓敬告來禩

淑夫人青松沈氏墓誌銘

并序

故大司諫洪公諱禹瑞配淑夫人沈氏青松人曾祖
諱偃四山監役贈領議政祖諱之源領議政考諱益
善豐德府使豐德公本生祖曰旌善郡守諱俠考曰
處士諱之澤夫人自幼孝悌至篤及歸洪氏推是道
以事舅姑友妯娌既順既敬夙夜無斃良辰盛設備
盡娛悅疾而膳飲喪毀祭愨繇初訖終一心齊肅事
之之則也同爨合室勿表以禩長亡有育無間已出
季冲而子倍加愍恤居申告戒病親饋歎友之之實

也內助甚善正而有禮性介潔嚴於辭受恒恐累及君子以是大諫公清名益彰始舅府使公以宗子夙殞權攝其事及主後定夫人盡收器用諸物一以歸之纖毫不留理家得宜每躬視大諫公供羞未嘗一日或替教子有法必使循蹈規矩尤謹男女之別御下不煩而整肅斥巫卜不喜奢華唯女紅是勤才長針線克緻而捷人稱手頭有神晚持大諫公制過哀成疾沉淪薦席者七年常以近先妣喪餘不受晷日享當辛丑周甲之歲親黨力請執不許斯可見終身之慕矣至次年五月十五日卒祔大諫公葬有二男

三女男長啓欽進士壯元次啓鉉女適庶尹金泰衍
參奉趙榮曾士人尹滌啓欽男朝海鵬海季天三女
幼啓鉉有一女幼金庶尹有子仁大女適徐日修趙
載福趙參奉有二男二女朝海有一女並幼洪氏系
南陽府使公諱受澆其考諱處厚祖諱命元俱官京
畿觀察使夫人與吾先妣鄭夫人同出於花浦洪忠
正公翼漢爲姨從兄弟余故習知夫人德美今見啓
欽所爲狀尤該而悉蓋不可勝書姑約其語以誌而
爲之銘曰

含章可貞叶地勢坤有茲淑美光纘盛門載實垂永

彤管斯存我觀其出忠臣之孫莫曰芝醴無有本源

全羅道觀察使李公墓誌銘

并序

歲壬午 肅宗大王謁孔子廟命我先君試士泮宮
鳴巖李公實登是科暨折號還第帶笑容而詔不肖
曰吾承命取士得月沙孫家世固亡論卽其人亦自
不凡可喜余時未及與公相熟而先君素方嚴少許
可一言之獎足斷其平生遂傾心親嚮而公遽卒矣
今借墓隧之詞得紓存沒之感其亦幸也夫公幼已
有識度長老咸器異之未弱冠值權兇用事卽廢舉
自修速更化始中辛酉司馬已巳 坤聖出就私第

諸賢駢首禍網伯氏僉正公亦竄西陲公屏居不與
世事與羣從詩酒相過悲吒慷慨甲戌 中闈復正
兇徒退黜朝廷方收拾才彥除冰庫別檢歷數官出
監龍宮縣居三歲有所不樂拂衣去又歷四官出永
同縣監移判全州公前爲邑威惠并行至是益恢有
餘地治理流聞旣釋褐朝野相賀得人有寔人子承
忌者指誣以考官用私盖欲污鱗金榜也 上燭其
情下之理責問誰受其人悉輸服命并嗾者竄之公
猶不安棄官歸湖甸拜正言持平不就及再除罷勉
出謝上封事極論 上喜諂厭直淵膝無常遠賀異

物多設官屯嬪御怙肆防限漸弛銓曹唯循請囑廟
堂輕假公爵又請勿以朋黨疑羣下盖與朱子與雷
魏公書同意語甚確士論韙之有一諫官及露章深
攻自此踪跡益困屢拜玉堂春坊獻納吏曹郎皆不
仕 上輒加敦迫公終不應命焉 上怒斥授南平
縣監明年春復以玉堂召獻納詹正言履相又論科
事至請拔榜 上惡其逞奸黜補邊邑慰寵公甚至
已差濟州巡撫御史力辭榮銜以直講辭朝農巖金
公歎曰樹脚之堅古人殆不如也還歷拜應教輔德
司諫俱辭時壬人柄政廣張機括有林溥者以辛巳

獄事爲注誣陷前日按治之臣及覈問奸情畢露而
當事者愈欲成其誣李潛踵上兇書杖斃而嶺人金
世欽權斗紀等繼之公以執義抗疏歷陳時輩樂禍
之態剖破肺肝靡遺且言斗紀既命遠配世欽不可
異罰時臺臣李東彥積忤於世見誣以不孝歿獄中
公於疏末列其寃 上下嚴批唯世欽事從公言於
是邪黨恚甚劾罷之踰年而始叙又出補襄陽府使
明年以應教召時邪黨疎斥朝著稍清人多勸公出
公曰七年自靖今何得遽變所守亡何擢授水原府
使又陞全羅道觀察使談笑指揮案牘一空有被殺

而賊不得者獄久未決公詞捕正法得其屍官與歛
需而厚葬之士人妻見疑房帷投井歿跡涉曖昧經
累年公親閱其案而白之南人喜而誦曰前史稱神
明吏不是過也公氣貌俊嶷神情爽朗性沉毅寡言
笑人不得以親疎最惡暖姝齷卷隨世俯仰者面斥
不饒常曰世之任言責者毛舉人小失顧於大是非
逡巡吾不取也以是所進言率勁亢無所茹吐平居
簾閣據几澹若無爲及至賓友樽俎之間風流映發
意氣豪上不覺酋酋襲人也斥邪扶正趣舍甚明恒
尊慕儒宗既上章伸誣禍亟哭以叫閭內行純篤蚤

失怙事伯氏如嚴父晨夕不離母夫人側清約之操
絕出於人婁與州藩不長尺寸耽羅之役私費不上
於官歸又不帶海物及沒家累蕩析幾不能自存世
共歎服公家以詞翰相傳盖累世也至月沙公諱廷
龜文章動天下寔爲公曾祖而祖諱明漢考諱一相
連三世柄文世稱 國朝無兩公所胚胎者旣如此
而公又夙悟六歲能讀書踰龔文已成中泮製衆推
爲華國手及長大肆力於六經子史爲詩藻思橫逸
調韻道健文亦不作陳俗語三淵金公謂公才天得
爲多不專出於孺染別有雄邁絕塵之氣爲不可及

陶谷集 卷十六
云已丑命選湖堂主文者非公素好而不敢不舉公
方在外官而得之亦擺例也雅喜山水域中諸名區
游賞殆遍輒有吟哦叙述掀簸景像又可見襟度之
曠遠矣抑又念世之期公非徒然也詞壇執耳台席
贊元指無得先公屈而乃反中途輟跡永爲吾黨之
嗟傷豈世運將否天不欲使英賢久淹於芬濁耶噫
嘻悲夫公諱海朝子東其字而鳴巖號也系出延安
母文化柳氏郡守仁聲女媿南原尹氏郡守以健女
生男徵臣都事崇臣女適金時述繼媿坡平尹氏通
通郎烜女生男泌臣度臣女適說書金若魯士人俞

德中孫器輔珪輔彝輔餘幼外孫男女亦幼公以辛
卯十二月二十四日卒全之官舍享年五十二訃聞
祭賻如儀葬龍仁文秀山高祖公兆次坡平夫人後
卒而祔南原夫人葬同山別崗銘曰

世季而塾士趨貶兮蝮志厭厭又諛諂兮公惟偉儼
律厓广兮宏標峻檢義以砭兮值時幽險跡久歛兮
乍登朝剡鴻未漸兮天庭旣揆藹稱艷兮我驅維範
剛孰揜兮有厥睽閃獄斯愴兮奮舌直犯勁尺劔兮
晚膺分陝才用贍兮政戒弛泛操簡儉兮公望廩廩
罔有慊兮濟川大艦牛耳坵兮鵬培闕颺理莫驗兮

弘璧琬琰絢光焰兮奇氣孔范寓鉛槧兮宋坡明弁
匪漸染兮淵老題品詎或僭兮而祖是念寔無忝兮
佳城掩苒英魄寔兮刻銘以諭彌億稔兮

榮川郡守朴公墓誌銘

并序

公諱世樑字履卿姓朴氏羅州潘南縣人十世祖諱
尚衷名顯麗季後諡文正高祖諱紹司諫爲趙文正
所重後諡文康曾祖諱應福大司憲祖諱東望吉州
牧使考諱潏軍器僉正妣綾城具氏綾海君宓女公
天資坦易淳慤與人無町畦少游尤菴同春二先生
門益飭躬不懈內行甚修奉寡姪睦親黨多人所難

及歷官中外壹以廉約自厲居處服用任其弊陋有
厚德嘗里居寔甚欲賣鷹爲資有以重價請易者笑
曰吾鷹不才安用此却其半卽此一事他可類推也
同春樂其真率獎與特深早攻詞藝爲趙公復陽鑑
賞顧屢屈公車勉就蔭調由 敬慕殿叅奉例陞奉
事而始中進士又陞直長主簿出監陽智新昌二縣
入爲監察工曹佐郎宣惠郎廳等職及爲歙谷縣令
時事大變意不樂投綬歸卧安邊之鶴浦爲終老計
有詩曰月是古時月人非舊日人賢臣多放逐 聖
主與誰隣憂時慷慨之意可見矣庚申國家更化猶

絕意進取李公敏叙美其志操汲引甚力始除咸興判官病辭復爲宣惠郎長興庫有積獎金公錫胄長銓舉公兼主簿蓋知公才特東非例授也提調閔公維重甚任之間除溫陽郡守啓畱不遣居五年績成始遷工曹正郎漢城庶尹出爲大興郡守遞爲儀賓都事除稷山縣監以公格不赴復由工曹出爲榮川郡守公才長於治民在新昌值歲大飢夙宵殫慮全活甚衆爲政務主誠實不爲浮文末節一以德惠爲理民愛戴至號以生佛有悍子不母其母繫獄一境人因臚列其罪請無赦公愀然曰不教而殺不祥召

其人委曲曉以倫義其人大感悟泣請自新公喜厚遺而遣之遂折節爲善反以孝見稱時麥有一穗兩歧或四五歧者民欲告使府彰公德政公力沮之茲皆方策所紀而復見於公古人不足多也公雅不喜誇詡而聲實自著有繡衣揚言曰吾周察湖邑審知朴其荒政之善祇以非廉問邑不得並入於褒章可恨其爲歛谷邑有逐月上供役夥民少害日滋公自爲經理痛滌其弊闔境安堵公餘以一鞭逍遙海山間民或不知爲太守其風致可思也及歸民爲豎鐵碑期於無泐公外若疎宥內實沉毅足智常曰我國

兵政甚疎臨亂每致敗衄西北邊山岷素驍健善砲丸能飢寒若得數萬人厚廩精鍊所向必無敵矣矧矧語人疾革夢囈亦此事口呼遺疏未半而逝蓋公以母夫人殉節虜難至痛在心思以一籌半畫少裨聖朝薪膽之圖常懷耿耿至死猶不已其意絕可悲非如古之喜功名談兵略者比也公以 肅宗癸酉七月四日卒享年六十六葬鐵原鶻坡配延安金氏縣令厘女先卒祔公墓公有一男二女及庶女一人男泰範司議泰範子弼光庶子弼謹萬戶師慶師迪弼謹出也女所歸若得姓者幼者并略之公與我

先君子忠正公同爲湖邑宰甚相善交義白首不渝其自榮川歸也疾已沉篤扶昇訪先君於楮島江上歎曰吾病殆將不起欲與平生故人面訣耳一宿爲別執手戀戀而去居無何訃至先君傷悼忒甚至今思之歷歷如隔晨事司議君委叩數舍之地屬以幽堂之文非謂顯可堪斯役特以先故誼分之重則嗚呼其何忍辭乃投涕而爲銘曰
循吏之績長者之風厚厥所蓄廼克有充于內于外馳譽靡窮趾跡冗散維抱也忠簣上半藁允矣深衷茲謂不沒以昭其終

統制使李公墓誌銘

并序

北青之李出自之蘭之蘭本北方人佐我太祖開國功烈茂著錫姓賜籍封青海伯青海者北青號也是後多以武顯至諱麟奇有詞翰氣節名重儒林官同知中樞贈贊成其子明老學生贈承旨孫文柱司僕僉正贈叅判曾孫詡宣傳官亦贈叅判娶金溝李俊生女生公諱壽民字一卿爲人和易任真未嘗有厲色忿言簡儉自飭被服寒素事父母盡其孝養身任汲水爨薪之勞哀兩甥幼失恃育于家爲之制產資婚少而端序則見爲長老所期許業儒不成奮曰

丈夫立身何文武之擇投筆登丙辰科由宣傳官陞訓練主簿轉都檢都事經歷皆選也出爲高原樂安二郡守長興鐵山二府使羅州討捕使入爲羽林司僕二衛將庚寅拜全羅左水使秩滿復以宣傳官拜長湍府使又出爲全羅兵使入爲御營中軍禁軍別將副檢管復出爲三道統制使公勤於奉公莅外一以約已寬民爲主歲惡賑賑甚力多所全活最惡豪猾武斷輒痛繩之雖間爲所中弗顧也遇有弊害必次第釐革無遺便尤留意兵事善敎戈甲罔有不弔御史巡撫使褒聞其績然公亢直不爲利勢屈頗踣

於宦塗嘗爲南虞候病未赴或疑其厭避配本鎮有解者得已拜濟州牧使會寧府使亦見尼 景宗元二之間羣兇盜乘盡逐善類編管南北遠惡地意猶未慊起大獄夷戮 先朝將相公素爲夢窩疎齋二相國知獎至是二相國爲禍首兇徒憚嫉公殊甚鈎索罪釁無所得公在統閩值夢窩赴謫出候道左使偏裨護行又遍餽南北謫人人止之笑曰老夫年迫八十雖用此獲罪奚憾亡何兇徒謂公曲護逆黨請遠配又誣公輸累萬匹綿布于京資逆謀請覈訊公蓋前此訓局乏貲乞貸公營布數纔半之及大將李

弘述考歿乃欲毆公同案隨意翻騰其數構捏不遺餘力顧簿籍具在無可以爲罪例當疏放而拘囚二年置不論卒之拗法竄旌義縣縣在大海中多霧露毒其明年甲辰十一月壬子公疾卒於服舍享年七十四又明年四月丙戌歸葬龍仁窟巖先人兆次時我 聖上新履大位屏黜奸兇召還舊人命復公官爵遣禮官以祭談者喜公寃至此始伸而惜其壽命不能數月待也夫人順興安氏通德郎斗極女婦德克備內贊弘多 肅廟上賓會公繫官于外夫人獨在家能制服以哭無違禮其曙於大義如此後公五

年卒祔公墓有一男二女男楫女適士人申思昂以節行旌閭次適兵使崔命柱楫有繼子慶章申有繼子暉崔有一子祉曰楫公庶子也楫抱狀泣請公幽堂之銘余固嘗習知公亦公在理時謫遐塞者也所罹事雖殊其爲當時苦獲中人則均焉嗚呼其又何辭銘曰

襄烈流裔松溪孫子寔繩武勇復襲氣誼歷試州閩隨有可記丑寅之禍同我善類遥遥島嶼中彼凶異考蹟稽實于先奚媿載美幽石永詔來禋

貞夫人豐山洪氏墓誌銘

并序

古之稱述女德者彤管之記中壘之編尚矣 聖朝撫運王化熏徹內教之敦亡愧往昔雖編戶之賤尚亦有凜然以禮則自持者矧出於法門名胄者乎若故牧使趙公配貞夫人豐山洪氏卽其一也夫人是我先公姨妹余固已熟知其德懿而今按其子彥臣翊臣所爲狀蓋美不可勝書姑摭其大者其紀始至日孝奉兩世姑嫜姑嫜善之恒稱昌吾門者此婦六親無不交口騰譽其中年事曰牧使公三妹俱未行一弟早世諸兒幼弱教誨婚嫁俾克成立奉先祀必謹而潔嘗隨牧使公往南邑迎養姊之居近土者事

之如母念親家貧不能供祀爲買田而助之其理家
曰勤約節儉幹理有度濟窮卹匱猶恐不及不事積
箸家用自裕待姬妾以恩御婢僕以正在郡衙嚴防
內外限絕勿使交關其教子曰雖甚愛不廢義訓必
勉以忠信孝友每稱舉內舅文谷公使之儀法辛壬
禍後彥臣奉夫人退居窮峽夫人安之若素後當戊
申亂莅清州清賊藪也夫人貽書曰臣子義當歿毋
以我爲念洎登宰秩夫人愀然曰汝靡德以堪冥升
可懼喜翊臣得歲修所謂汝占此仙區世間榮貴殆
不足易及見廢舉求志輒獎成之噫夫人之德若此

直可於古人中求之夫豈末俗簪珥之倫所可企及
也哉蓋夫人之考縣監柱天祖府使霍而府使之考
卽宣祖朝名臣大司憲諱履祥號稱慕堂公者也
縣監娶安東金氏同知光燦女同知之考卽清陰先
生諱尚憲也夫人以此兩家之出鬱有承受則其衆
美之畢該無怪也嗟乎哲哉夫人生于孝宗丙申
卒時年七十七合墓于楊州茂山牧使公兆次牧使
公諱泰興淳昌人彥臣文科叅判翊臣有子宗溥及
其弟幼者宗溥後彥臣銘曰

嗟哉碩人孔仁且哲飭軌邁訓幼老若一婦婦母母

則彼閨闈豈惟閨則宜世是律我銘斯懿追媿往烈
德則多有愧非鴻筆

廣興倉主簿徐公墓誌銘

并序

達城徐氏自忠肅公諱洵奮興 昭敬王朝門戶益
大以盛累公累卿爲世稱艷唯忠肅曾孫主簿公乃
能委身儒學周旋師友間名行重於時論者謂及勝
以官位致顯者云公諱文澤字潤章祖諱景霄尚
昭敬王女封達城尉考諱晉履義禁府都事贈吏曹
叅議妣慶州金氏副提學慶餘之女李忠定公貴之
外孫公出自內外名家稟資寬重不加矯揉而尤以

誠信稱絕無忤克忿愷意家酷貧守已甚嚴視世營
利者若浼也素澹靜厭進取里居清州十餘年幼失
怙恃事兄姊友悌篤至鄉之人服其行以爲矜法間
游太學力恢士論已已兇徒誣辱栗谷牛溪尤菴三
賢時有儒章申辨而挾私意不舉尤菴士類憤惋別
擬陳暴推公爲疏首公慨然應之終以益禍尤菴多
挽止不果上公歎恨不已甲戌時相營護謀害 國
母之賊館學齊聲請討士多顧瞻畏避公奮然不少
沮辭義嚴正士林大快公三十一始中司馬選自經
已已仍不屑求舉公議惜之爲除 禧陵叅奉已換

慶基殿屢遷廣興奉事平市直長廣興主簿以丙
戌十一月二十一日卒年僅五十配南陽洪氏進士
一字女有淑德一門稱以女士先公五年卒與公同
葬于楊根郡東大谷里凡舉七男長宗集府使次宗
翁叅奉次宗燮大司諫次宗業都事次宗暉叅奉次
宗伋大司憲次宗浹縣令宗集子命寬女適吳瓚李
奎臣宗翁子命取命宰女適尹師淵宗燮子命元宗
業子命應女適李思元宗暉子命仁宗伋女適任邁
金肅行宗浹子命直女適李嘉永餘幼者俱不錄公
始以宗浹從勲贈吏曹叅議又以宗伋秩二品推恩

贈同曹叅判配從贈貞夫人噫公有志有行終厄於
命弗遂顧子姓特蕃行人咸意其必有餘贏今過二
紀而袍笏聯疊榮及泉隧不食之報此其徵也夫銘
曰
勤謹孝友四字嘉符公以是敦終已弗渝臨篋詔子
益驗遺模我篆其實用昭幽塗

部將徐君墓誌銘

并序

余嘗觀澤堂李公撰北關志得鄭公文孚臨難倡義
之蹟壯其志而欽其績因想當時關北人士不待倡
而起者必多慷慨非常之倫而恨其名姓之或漏於

後也今有咸興人徐永後者袖一文字來眎余喟然曰永後高祖諱敬忠字君輔素剛毅有膽氣壬辰之難倭賊入北路亟往見巡察使尹卓然陳討賊方略尹公大奇之署爲伏兵將激厲徒衆得三百餘人戰於咸興又戰於洪原俱殲賊甚多叅軍功錄一等丁酉倭再搶又力戰屢立大功超拜忠武衛左部將蓋當賊勢長驅列郡瓦解之日噉鋒挫銳勞勩茂著其殉國精忠何渠不及於從鄭公諸人哉特以人微獨倡之故未免泯沒至今此不肖孱孫所以居常痛慨者也如假大君子筆力以表颺一世則其爲不朽圖

大矣敢以請余曰誠如子之言其誠節固足可尚宜牽連書諸鄭公遺事之後以爲北人勸也徐出利川麗朝名臣熙之苗裔云爾國依漢傑千壽曾祖祖考考而叅奉金有光女其妣也嘉靖丙寅生年七十卒葬于咸興府東羅屹川之原配韓氏祔有二女適韓國俊韓興業側室有男女十人德潤仁俊禮俊智俊信男男也全思立崔思信文尚立韓希尹金有秋妻女也後承繁不盡載銘曰

北俗伉健忠義是循有激于衷奮不顧身曰維徐氏當壬而力豈云微歟允效其績我永詩之用闡幽逃

通德郎洪君墓誌銘

并序

君諱德普字施甫南陽人領議政文簡公諱命夏之子分兵曹叅議贈領議政諱瑞翼之孫判中樞府事文貞公諱聖民之曾孫母貞敬夫人南原尹氏以孝宗九年戊戌生君生而端好粹然如玉人期以遠到十歲而孤仍多病失學十六委禽於我先考左議政忠正公雩沙先生之門先君愛其質美勸讀古聖賢書以資灌沃君奉承弗怠以疾時作時輟卒未有成間應大小科亦不利然有孝友行慈仁純慤絕無年少遨放習性介潔視財利若浼居家持身有過於

人者年三十一遘厲卒於其四月二十三日先君爲文而哭之悼惜甚至所謂醞藉善良宜世其家者卽贊君語而知君者以爲此八字足盡君平生云葬于廣州細村配龍仁李氏我仲姊也無育取君叔兄縣令公季子得福爲後工曹佐郎有二子致元致亨女適金載齡李命廸余自幼年與君同處蓋未見一事不可儀者閱人之多益知如君者難得於今世也佐郎君亦有至性馴行優於嗣守先業余每喜吾姊無子而有子乃棄吾姊而歿君生旣窮厄後事又益荒涼善人天不福有如是耶悲哉悲哉致元要余志君

之蔽且曰此吾父遺意也遂杖涕而爲之銘曰
蓋聞先聖有苗秀之喻從古以來何限中途而不遂
嗟惟君苗乎秀乎又將推君之不幸延及於其嗣乎
栽培之理莽乎難知余方傷今追舊不勝其系歎於
斯者矣

陶谷集卷之十六

